

The Easy Way To Promote Your Business

HIGH QUALITY, BEST PRICE IN PNG

Business Cards

K132 inc. GST
* 200 SINGLE SIDED COLOUR CARDS

K220 inc. GST
* 200 DOUBLE SIDED COLOUR CARDS

* PRINTING ONLY - DESIGN NOT INCLUDED
* COLLECTION AT 4PM NEXT DAY (MON-FRI) FROM APPROVAL OF DESIGN / RECEIPT OF PRINT READY FILE.

Only at

THEODIST LTD
THE STATIONERY SUPERMARKET

Waigani Drive, POM
Ph: 313 9800
sales@theodist.com.pg

Markham Road, LAE
Ph: 472 5488
saleslae@theodist.com.pg

Wantok

Today
insait

Pes 9, 10, 19, 20

Kefiu long UPNG na Unitech

WANPELA nambawan haus bilong Yunivesiti ov PNG (UPNG) i paia long las wik Fraide moning. Dispela haus em Printeri Haus we UPNG i save printim ol eksem pepa na arapela pepa bilong skulim ol sumatin. Dispela haus em i opis bilong Univentures Limited, wanpela join vensa kampani bilong UPNG na wanpela kampani bilong Saut Korea. Polis bai mekim wok painimaut long sekim husat i kukim dispela propeti bilong UPNG. *Lukim moa stori long Pes 3.*



Lupari: Kantri i ron gut - P2

O'Neill no gat sea long Black Swan - P3

KEBINET i tok orait long bihainim advais bilong Nesenel Sekuriti Advaisori Kaunsil (NSAC) long larim kefiu o taim tambu i kamap long Yunivesiti ov PNG (UPNG) na PNG Yunivesiti ov Teknoloji (Unitech).

Praim Minista Peter O'Neill i tok dispela kefiu bai lukim ol polisman i putim was long olgeta rot bilong tupela nesenel yunivesiti long Pot Mosbi na Lae, na polis bai helpim ol yunivesiti atoriti long stopim ol manmeri nating o sumatin i wokabaut na raun nating long kempas, stat long 7-klok nait i go inap 6-klok moning.

de, o klostu long wanpela mun long Yunitech na UPNG wantaim.

As bilong dispela was bilong polis long tupela yunivesiti em long stopim ol ausait manmeri o ol raskol i helpim ol sumatin na kukim kar, haus na kilim arapela sumatin.

Praim Minista O'Neill i tok Kabinet i mekim dispela disisen long larim ol sumatin i go bek gen long skul na stopim ol protes ol sumatin long tupela yunivesiti i wok long mekim bikos dispela asua bilong lo na oda na nesenel sekyuriti long kantri.

Long las wok Sarere long Lae, ol man i bin kilim wanpela sumatin

long Unitech na kukim haus kaikai bilong ol sumatin, mini-laboratori, haus bilong SRC presiden na maining enjiniaring dipatmen.

Nem bilong dispela sumatin em Graham Kombyala Ramonong na em bilong Mendi long Sauten Hailans Provins. Em i bin mekim fes yia na stadi long Lens na Sevei taim ol man i kilim em long Sarere nait long las wik.

Long las wik Fonde long Pot Mosbi, 5-pela kar bilong Uniforce sekyuriti long UPNG Waigani Kempas i bin paia.

Wok painimaut bai sekim husat i kukim dispela ol kar. Ol ripot i tok ol sumatin i bin belat wantaim ol sekyuriti na ol i bin pait na

kukim dispela kar tasol wok painimaut bai kamap long sekim dispela asua.

Long Fraide moning, wanpela haus long Waigani kempas tu i bin paia, tasol ol i no save husat i kukim dispela haus.

Ol bai mekim wok painimaut long sekim husat tru i kukim dispela haus.

Dispela haus i gat ol printing masin we UPNG i save yusim long printim ol eksam pepa na arapela ol samting bilong stadi.

Mista O'Neill i tok ol polisman bai putim was long tupela yunivesiti long Pot Mosbi na Lae wantaim, na helpim ol sumatin long go bek gen long skul.

"Laip bilong ol sumatin na ol leksera i no stap gut long tupela yunivesiti wantaim. NEC i mekim dispela disisen long larim ol polisman i go stap long tupela kempas na wok bung wantaim ol sekyuriti bilong tupela yunivesiti," Mista O'Neill i tok.

Mista O'Neill i tok gavman i les long stopim 2016 ekedemik yia.

"Gavman i no gat wanpela plen bilong stopim 2016 ekedemik yia. Mipela i laikim ol sumatin long skul, na long stopim dispela asua bilong lo na oda, we ol sumatin na ol ausait manmeri i wok long bagarapim ol propeti bilong yunivesiti na kilim ol sumatin, gavman i mekim disisen long kamapim dispela kefiu," Mista O'Neill i tok.

Buy Your Air Niugini Ticket
Anywhere, Anytime
Using BSP Mobile Banking.

Reminders:

- > Must be a registered BSP Mobile Banking customer.
- > Obtain a booking reference with Air Niugini prior to making a phone banking payment.
- > Use your e-ticket details to Check-in at the airport or online via www.airniugini.com.pg
- > Available to Digicel and bmobile-vodafone subscribers. Mobile service charges apply.
- > Fare conditions apply.

Air Niugini

www.airniugini.com.pg

Travel Purchase Queries: 180 3444
ehelpdesk@airniugini.com.pg

Mobile Banking Registration: 320 1212 / 7030 1212
servicebsp@bsp.com.pg www.bsp.com.pg

Mi tingim bifo taim Flame stockfeed i bin nambawan kwaliti na value stockfeed bilong ol pik bilong mi...
 nau emi kam bek!
WELKAM BEK!



Lupari: Kantri ran gut

SIF Seketeri Isaac Lupari i tok PNG i ran gut na i no gat wanpela no gut samting i kamap long ikonmi bilong dispela kantri.



SIF Seketeri Isaac Lupari

Mista Lupari i tok ikonmi bilong PNG i ran gut na gavman i was gut long wanem samting i wok long kamap ausait wantaim ol prais bilong komoditi olsem oil.

Em i tok ikonmi bilong kantri i stap gut tru stret na gavman i bihainim gut tru plen bilong em long yusim mani gut tru stret.

Mista Lupari i tok planti ol bikpela investa i laik inves long PNG na mekim bisnis long hia bikos ikonmi bilong PNG i stap gut na ol i bilip long politiek stabiliti we gav-

mekim bisnis long hia sapos ol i lukim olsem kantri bilong yumi i no gat mani na ikonmi bilong kantri i no ran gut.

Mista Lupari i singautim ol manmeri husat i wok long opim maus nating na toktok olsem kantri i no gat mani, long putim ol evidens bilong ol na toktok.

Mista Lupari i tok kantri i wok long bungim liklik hevi long mani taim oil prais na ol prais bilong komoditi i pundaun i kam daun long intenesenel maket tasol dispela i no kamapim bikpela bagarap long ikonmi.

“Em i no asua bilong gavman. Gavman i no save kamapim maket. Em ol samting i kamap ausait long kantri bilong yumi i wok long senisim prais bilong oil na arapela ol komoditi, em i no asua bilong gavman,” Mista Lupari i tok.

Em i tok gavman i makim wanpela komiti ol i kolim ‘baset menesmen komiti’ na ol memba bilong dispela komiti i save bung long olgeta Tride long olgeta wik long sekim hamas mani i wok long kam insait long gavman na hamas i wok long go aut.

“Edukesen, helt na infrastraksa em ol namba wan samting we gavma i lukluk long en.”



Jomba polis stesin we ol lain i ronawe long las wik Fraide.

Planti kalabus lain ronawe hait yet

James G. Kila i raitim
 BIKPELA namba long ol kalabus lain husat i ronawe long Jomba polis stesin rumgat long Madang em polis i no holimpas ol yet bikos ol i hait yet.

Madang polis stesin komanda, Sif Inspekta Vincent Isanda i tokaut long dispela toksave i go aut long pablik long Madang taun i putim was na givim ripot long polis sapos yu i lukim nupela pes i raun stap long eria bilong ol.

Dispela em namba tri taim long dispela yia tasol we i lukim ol kalabus lain i ronawe long Jomba polis sel.

Sif Inspekta Isanda i tokaut olsem namel long dispela 51 kalabus lain husat i ronawe long las wik Fraide moning long Jomba polis stesin sel em planti long ol em polis i lokim ol bihain long ol i spak na wokim nabaut long strit.

Mista Isanda i tokaut tu olsem 4-pela long ol lain i ronawe em polis i holim ol long sas bilong

karim ol gan na katres. Antap long en tu wanpela long ol lain husat i ronawe em polis i holim em long sas long kilim indai arapela man.

Em i tokaut tu olsem Jomba polis stesin long Madang long nau yet i gat hevi long sait long gutpela banis arere long sel blok, na em i raitim leta pinis i go long Madang Semba ov Komes na Industri long helpim polis long putim kamap strongpela banis rausim sel blok eria long Jomba polis stesin.

TribeFM Teen Excellence Awards 2016
 Nominate your 'Teen Hero'

Do you know an outstanding teenager, who demonstrates leadership and resourcefulness in their community?

The 2016 inaugural TribeFM Teen Excellence Awards will celebrate 7 teenagers from across Papua New Guinea, between the ages of 13 and 19 who have demonstrated personal growth, leadership and a commitment to the community in which they live.

CATEGORIES AND CRITERIA
The nominees must demonstrate the core values of personal growth, leadership and commitment.

HEALTH & WELFARE
 For a young person dedicated to improving their own health and that of those in their community by encouraging health-focussed activities in their schools, families and other community groups

MUSIC & ARTS
 For a young person who's shown outstanding ability in the arts and music and may have used them to effect change in their community

SPORT
 For a young person who's shown significant sporting dedication and achievement and may have used them to contribute to their community

COMMUNITY
 For a young person who's passionate about putting other people's needs first, having given up their time and energy for their community.

EDUCATION
 For a young person who's shown significant achievement or improvement in their schooling, or someone who has a track record of supporting the learning of others

BUSINESS & INNOVATION
 For a young person who's innovative and demonstrated a business activity that benefits themselves and their community

DISABILITY
 For a young person making a difference by supporting those with a disability, including young people with a disability who are making difference to their own lives and the community

HOW TO NOMINATE
 Fill out this form with as much information about your nominee as possible. Incomplete forms will not be accepted.

Entries MUST be received by 5.00pm on Friday 22 July 2016
 Please submit your completed form to TRIBE 92FM via one of the following ways:

Mail to: Tribe92FM, NBC, PO Box 1359, Boroko, Port Moresby, PNG
 Drop in person to your nearest provincial NBC OFFICE
 Via TribeFM's Facebook page (send a photo of the completed form)
 Via Whatsapp to 7019 9105 (send a photo of the completed form)

Queries can be directed to 325 3439 between 8.30 – 4.30pm, Monday to Friday or email wgorogo@nbc.gov.pg

NOMINATE YOUR 'TEEN HERO' FOR THE INAUGURAL TRIBE92FM TEEN EXCELLENCE AWARDS

Please TICK ONE of the following categories to nominate your TEEN HERO:

HEALTH AND WELFARE
 EDUCATION
 DISABILITY
 SPORT
 COMMUNITY
 BUSINESS AND INNOVATION
 MUSIC AND ARTS

NOMINEE'S DETAILS (Teen Hero):
 Full name: _____
 Address: _____
 Date of Birth: _____
 Contact phone number: _____

NOMINATOR'S DETAILS:
 Full name: _____
 Relationship to your Teen Hero Nominee (ie father, teacher, Church leader): _____
 Address: _____
 Contact phone number: _____

On a separate page, explain in detail why your Teen Hero deserves to be recognised in this year's TTEA Awards. Attach it firmly to this nomination form.
 You **MUST** include specific examples of how they have demonstrated personal growth, leadership and commitment in the category you are nominating them for

Rules/Conditions of Entry:

- Open to PNG residents
- Nominees must be aged between 13-19
- Groups/teams may be nominated
- All nominations must be accurate and original
- Final judging will be done by a panel appointed by TribeFM
- If judges find there are no suitable nominations for a category, no award will be allocated
- Finalists will be notified by phone
- Winners will receive awards/financial sponsorship which are expected to be reinvested within the category they've been awarded
- Winners' names/photos and other details will be published in the media

Proudly supported by:

NBC NATIONAL BROADCASTING CORPORATION PAPUA NEW GUINEA

Wantok
Ningim Bilong Gam Ol PNG Street!!

The National

Planti sumatin i no stap long skul

TAIM Kabinet i tokaut long kamapim kefiu o taim tambu bihain long planti bikpela hevi i kamap long Yunvesiti ov PNG (UPNG) long Pot Mosbi na PNG Yunivesiti ov Teknologi (Yunitek) long Lae, planti ol sumatin i lusim skul na go stap ausait long kempas wantaim ol lain o wantok bilong ol.

Asde long UPNG Waigani Kempas long 2-klok, wan wan sumatin tasol i bin raun long skul, na 5-pela polis kar i stap insait long kempas.

Ol leksera i pret long sefti na laip bilong ol na planti ol sumatin tu i pret nogut ol i lusim laip.

I no gat wanpela sain olsem ol sumatin i stap long klasrum na statim gen skul.

Olgeta kar i stop long sekyuriti beis na ol i pret long kisim kar i go insait long mein kempas bihain long 5-pela kar bilong ol sekyuriti i paia long las wik Fonde.

Wan wan sumatin tasol i wok long go kam long kempas tasol planti i lusim skul na sampela i go bek pinis long ples bilong ol.

Wantok Niuspepa i bin go lukluk raun long Waigani Kempas asde. Las wik tu em i bin go raun long hap.

Las wik planti sumatin i bin raun go kam tasol dispela wik i no gat sain bilong ol pikinini meri.

Wan wan ol man sumatin tasol i wok long raun i stap. Long dispela wik, planti ol leksera rum i pas.

Long las wik ol leksera rum, laibri, buk sop, admin opis, na sampela opis bilong leksera i bin op.

Tasol long dispela wik, planti ol opis bilong leksera i pas. Laibri tu i pas. Ol leksera rum i pas.

Sampela ol sumatin i stap yet long skul. Ol i tok pawa na wara saplai i ran yet, na mes o haus kaikai bilong ol sumatin i op yet, na ol sumatin i kisim kaikai long moning, belo na apinun.

Long Mande nait long dispela wik, ol ripot i tok sampela raskol i bin brukim Luavi haus bilong ol meri na i bin stilim ol samting bilong ol meri.

Tasol sampela meri husat i bin slip long dispela haus i stap seif.

Polis nau i wok long putim was long olgeta liklik han rot insait long kempas taim Kabinet i oraitim taim tambu.

Wanpela as bilong dispela taim tambu em long stopim ol raskol man na ausait manmeri i miks wantaim ol sumatin na brukim o bagarapim ol propeti bilong yunivesti.

Ol raskol na ausait manmeri tu i ken mekim dispela hevi i go bikpela sapos ol i kilim sampela sumatin.

Long dispela as tasol, Gavman i putim kefiu long stopim ol manmeri na kar long ran i go kam long Waigani Kempas, na tu long Taraka Kempas long Yunitek. Stat long 7-klok nait i go inap 6-klok moning, no gat wanpela kar, manmeri o pik dok bai raun insait long tupela kempas.

O'Neill no gat sea long Black Swan

PRAIM Minista Peter O'Neill i no gat wanpela sea insait long biknem sekyuriti kampani, Black Swan International.

Ol rekot bilong Invesmen Promosen Atoriti (IPA) i soim ples klia olsem wanpela man Australia, nem bilong em i Brian Kelly, em i papa bilong Black Swan (PNG) Limited.

Ol rekot i soim olsem Mista Kelly em yet tasol i 100 pesen seaholda na dairekta bilong dispela kampani, we em i bin rejistaim long yia 2011.

Taim ol sumatin long ol yunivesiti insait long kantri i wok long protes egensim Prais Minista O'Neill long step daun, planti manmeri i ges na i ting olsem Black Swan em i wanpela kampani bilong Mista O'Neill.

Tasol ol rekot long IPA i soim olsem Mista O'Neill, o sampela arapela manmeri tu, i no gat wanpela sea insait long kampani.

Mista Kelly bilong Sydney, Australia, i bin statim Black Swan long yia 2011, na nau taim dispela kampani i wok long gro i go bikpela, sampela manmeri insait long sekyuriti indastri yet i wok long jeles na mekim kainkain toktok long



Black Swan International i gat planti nupela 5-dua Toyota Len Krusa na Prado. Ol i save baim dispela kain kar long bikpela mani.

sutim bel bilong ol sumatin na arapela manmeri long kantri.

Papa bilong kampani na Sif Eksekutiv Opisa, Brian Kelly, i tok em yet i 100 pesen seaholda bilong Black Swan (PNG) Limited, na dispela sekyuriti kampani em i kampani bilong PNG.

Mista Kelly i bin autim wanpela pablik notis long niuspepa long kliarim tingting bilong ol manmeri long luk-save olsem dispela sekyuriti kampani i wok long gro i go bikpela na i no gat arapela manmeri i gat sea insait long dispela kampani.

"Ol manmeri i jeles na mekim kainkain toktok. I no gat wanpela manmeri i gat sea long kampani. Em kam-

pani bilong mi yet,"Mista Kelly i tok aut long dispela pablik notis.

"Mi yet mi papa bilong Black Swan. No gat narapela man i gat sea long dispela kampani. Em i kampani bilong mi yet, na mi rejistaim long PNG. Em i kampani bilong PNG,"Mista Kelly i tok.

Mista Kelly i bin mekim dispela toktok taim planti manmeri long kantri i wok long toktok strong egensim Black Swan.

Ol manmeri PNG i ting Black Swan em i wanpela kampani bilong Prais Minista Peter O'Neill.

Planti i wok long komplek long ol kontrak Black Swan i kisim long Pot Mosbi Jeneral

Haus Sik na arapela ol bikpela gavman dipatmen na opis.

Tasol Mista Kelly i tok sekyuriti sevis Black Swan i save givim em i winim arapela sevis bikos ol i wok long yusim ol nupela teknoloji long sekim gut na daunim ol birua na hevi.

"Mipela i ken lukautim ol wok manmeri, banis, kar na ol samting bilong kampani, na ol i ken mekim bisnis,"Mista Kelly i tok.

Ol rekot long Invesmen Promosen Atoriti (IPA) i soim olsem Black Swan i bin rejista long 2 Februari 2011 long IPA olsem wanpela lokal kampani.

Ol dispela rekot i soim tu olsem i no gat narapela dairekta bilong dispela kampani i stap.

Mista Kelly yet i kamap 100 pesen seaholda na em yet i dairekta bilong dispela kampani.

Long websait bilong Black Swan, em i tok as tingting bilong dispela kampani em long givim globel sekyuriti sevis na trening long daunim ol birua.

Websait bilong Black Swan i tok dispela kampani i laik kamap 'sekyuriti bisnis patna'bilong ol bisnis haus na kampani long larim ol i stap gut na mekim bisnis taim Black Swan i putim was long ol samting bilong ol.

Polis holim tripela saspek long Lae

POLIS long Lae i holim tripela sumatin bilong PNG Yunivesiti ov Teknologi (Yunitek) we ol i saspek olsem ol tasol i kilim wanpela sumatin long Sarere nait long las wik long Taraka Kempas.

Fes yia Lens na Sevei sumatin, Graham Kombyala Ramonong, bilong Mendi, Sauten Hailans, i bin lusim laip long Yunitek taim ol man i bin

katim em wantaim bus naip.

Bihain long en, ol man i bin kukim mes o haus kaikai bilong ol sumatin, mini-labrotari, maining enjiniaring dipatmen na haus bilong SRC presiden.

Met Supt Anthony Wagambie Jr i tok ol polisman i bin holim tripela saspek bihain long ol harim sampela tok win

olsem ol dispela man i laik lusim Lae na go bek long Hailans.

Mista Wagambie Jr i tok dispela tripela saspek em ol sumatin bilong Enga. Ol i bin hairim 5-pela kosta bas na ol i laik lusim Lae na go bek gen long ples bilong ol.

Tasol ol polisman i bin kisim sampela tok win na ol i hen-

sapim olgeta bas na kisim ol i kambek gen long Lae polis stesin, we ol i holim ol dispela tripela saspek.

Ol sumatin bilong Sauten Hailans na Hela provins i stap long haus kraik bilong Mista Ramonong long Lae yet, na ol sumatin bilong Enga Provins i pekim 5-pela haia bas na i go bek long ples bilong ol.

Pay for Air Niugini Tickets via BSP Mobile Banking

Obtain a booking reference from Air Niugini website www.airniugini.com.pg, Call Centre on 180 3444 or any Sales Office prior to making the payment.

Dial *277# To Pay

Available to bmobile-vodafone & Digicel subscribers. Mobile service charges apply.



320 1212 / 7030 1212 - 24/7
 servicebsp@bsp.com.pg
www.bsp.com.pg

PNG Maritaim Koles makim Wol Siferas De

James G. Kila i raitim

PNG Maritaim Koles long Madang we i gat nem long trenim ol save-man long wok long solwara long Mande, June 27 i amamasim Wol Siferas De.

Dispela de em long luksave long bikpela hatwok ol wokmanmeri husat i save wok long ol bikpela sip na bot i save wokim long bringim ol sevis long helpim wol tred.

WSD i save kamap long Jun 25, tasol ol lain long PNG Maritaim Koles i amamasim de long Mande wantaim mas we i kamap long moning taim tru, na i bin stat long Madang provinsal gavman opis i go long skul bilong ol.

Bihain long dispela ol sumatin i amamasim de wantaim ol singsing na danis na soim displei bilong ol kaikai bilong PNG. Koles i bin opim dua long Mande long pablik long go lukim wanem wok ol sumatin i wokim long skul bilong ol.

PNG Maritaim Koles SRC presiden, Albert Pidi Oala i tok klia olsem Intanesenel Maritaim Oge-

naisesin long 2010 i kamap wantaim tingting long makim Jun 25 long wan wan yia long luksave long ol wokman meri husat i save wok ol sip.

Dispela luksave long ol solwara wokman meri em long luksave long wanem ol samting ol i save yusim long olgeta de long laip bilong ol we i save helpim wok long solwara trenspot long wol.

Oala i tok olsem as tingting long luksave long dispela de em long tok tenkyu long ol bikpela hatwok ol wokman meri bilong ol sip long solwara i save wokim long helpim ekonomi insait long wol na tu, helpim i go long sivil sosaiti. Moa long en tu, em long luksve long planti ol birua o prèt ol dispela solwara lain i save bungim taim ol i save wokim wok bilong ol.

Em i tok klia tu olsem ripot bilong Intanesenel Maritaim Oge-naisesin (IMO) em i soim olsem ol sip i save wokim wok long trenspotim moa long 90 pese bikpela kago insait long wol tred. Moa long en tu ol solwara wokman meri i no save wok tasol antap



Sumatin bilong PNG Maritaim Koles amamasim flot long Madang Festival. Foto: James G. Kila

Oala i tok tu olsem dispela de tu i no luksave tasol long ol solwara wokman meri. Em i lukluk moa long sait long wanem hevi ol wok-

man meri bilong solwara i save bungim olsem ol stilman kamapim hevi long ol long solwara na ol arapela samting. Dispela de i askim

long moa luksave long wok bilong ol dispela solwara wokman meri na kamapim gutpela ples long ol i ken wok long solwara.

Bikpela wok painimaut bai kamap

KOMISIN ov Inkwairi (Col) o bikpela wok painimaut bai kamap long lukluk go insait long ol hevi i kamap long ol yunivesiti insait long kantri.

Praim Minista Peter O'Neill i tok gavman i makim pinis bipo jas Jastis Warwick Andrew i kamap siaman bilong dispela Col.

Dispela wok painimaut bai lukluk i go insait na sekim wanem samting i kamap long 4-pela yunivesiti na tu, long stopim

dispela kain hevi long kamap gen long bihain taim.

Gavman bai makim sampela moa save manmeri husat bai sapotim Jastis Andrew long mekim dispela wok na pinisim ol hevi long Yunivesiti ov PNG (UPNG), PNG Yunivesiti ov Teknologi (Unitech), Yunivesiti ov Goroka (UoG) na Yunivesiti ov Nesural Risos (UNRE).

"Yumi olgeta i laik save long ansa, ansa long

wanem samting i kamap, olsem wanem ol dispela hevi i kamap, na husat i asua.

"Olgeta manmeri long kantri i laikim ansa long ol hevi i kamap long dispela ol yunivesiti bilong yumi insait long kantri," Mista O'Neill i tok.

Dispela wok painimaut bai lukluk long wok bilong SRC, wok bilong ol menesmen

bilong yunivesiti, wok bilong polis na sapos ol manmeri long ausait i bin helpim na sapotim ol sumatin o no gat.

Taim olgeta samting i redi, Mista O'Neill i tok ol bai putim i kam aut long nisupepa, wanem samting stret ol bai mekim long dispela wok painimaut.

Mista O'Neill i tok dispela wok painimaut bai kamap long stretpela wei, na em i

askim ol manmeri long wokbung wantaim dispela Komisn long mekim wok stret.

"Moa long 8-pela wik i go pinis na mipela i laikim ol sumatin long go bek gen long klasrum na skul gen.

"Mi laik askim ol wan wan manmeri long helpim dispela Komisn long mekim wok gut," Mista O'Neill i tok.

Foren risev i pundaun: Polye

FOREN risev bilong PNG i wok long pinis hariap na gavman i mas mekim sampela samting long rausim dispela hevi.

Oposisen Lida Don Polye i tok foren risev bilong kantri i nau stap long mak olsem 1.5 bilien US dola (klostu long K5 bilien) na i wok long go daun hariap tru insait long tupela yia tasol.

Mista Polye i tok taim em i bin stap Tresera, foren risev bilong PNG i bin stap klostu long 4 bilien US dola tasol insait long tupela yia tasol dispela mani mak i kam daun long 1.5 bilien US dola.

"Long yia 2013 taim mi bin stap Tresera, foren risev bilong PNG i bin stap long 4 bilien US dola, tasol nau dispela mak i kam daun long 1.5 bilien US dola, o klostu long K50 bilien.

Mista Polye i tok long apim level bilong foren risev, gavman i mas helpim ol kampani long salim planti samting i go aut na kisim moa mani.

"Gavman i no ken kisim moa dinau mani. PNG i nidim moa mani long kam insait long kantri," Mista Polye i tok.

Mista Polye i tok dispela bai kamap taim planti bikpela projek wankain olsem PNG LNG Projek i kamap long kantri.

"Mani bilong PNG LNG Projek i no kam insait yet long kantri. Klostu long K4 bilien PNG inap long kisim long LNG i wok long go bek long K3 bilien dinau mani gavman i kisim long UBS benk," Mista Polye i tok.

Em i tok strong bilong PNG Kina i wok long pundaun i kam daun maski Benk ov PNG i wok long kontrolim dispela.

Sif Seketri bilong Gavman, Isaac Lupari, i tok ikonomi bilong PNG i stap gut long han bilong gavman, na ol manmeri i no ken harim ol giaman toktok na pret.

"Gavman i menesim gut mani. Ikonomi i ran gut. Ol bikpela kampani olsem Total SA bilong Frans i laik kirapim bikpela Papua LNG Projek.



Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.

Mipela i laikim ol Eijen long distributim niuspepa long dispela ol ples antap hariap tru!

Sapos yu ting yu em rait man o meri long dispela wok, ringim Sekulesen Supavisor bilong mipela long Fon: 325 2500 o Mobail namba: 7384 6688 o email i kam long: seovo@wantokniuspepa.com



Faipela kar bilong Uniforce sekyuriti i paia pinis long UPNG Waigani Kempas long las

Niuspepa i putim giaman ripot

OPIS bilong Gavana Jeneral i salim wanpela toksave pepa i go aut olsem wanpela tok we i bin kamap long Nesenel Niuspepa, olsem Gavana Jeneral i no hariap long mekim disisen long tok-tok bilong Lidasip Traibunal long rausim Memba bilong Not Flai Boka Kondra em i no tru.

Niuspepa stori long National niuspepa long Fonde Jun 16, 2016 we i bin tok olsem "GG told to act" i tok olsem Gavana Jeneral i save pinis long toktok bilong traibunal tasol em i no laik mekim samting. Opisal Seketeri, Tipo Vuatha i tok olsem dispela nius olsem Gavana Jeneral i westim taim long mekim samting we Lidasip Traibunal i tok lnog en em i paulim

tingting bilong ol pablik. Sir Tipo i tok klia olsem Opis bilong Gavana Jeneral i no bin kisim ol rekomendesen bilong Lidasip Traibunal na tu ol i no bin salim i go long Gavana Jeneral long mekim disisen.

Sir Tipo i tok em i wok bilong ol atoriti husat i gat wok long dispela kain wok olsem Suprim na Nesenel Kot opis long karim aut i tok stia bilong ol Lidasip Traibunal, long ol i ken givim long Gavana Jeneral long mekim i bihainim tok stia bilong ol.

Opisal Seketeri i tok-tok wantaim Suprim na Nesenel Kot opis long tok klia moa long dispela paul toktok.

"Opis bilong Gavana Jeneral i wet yet long kisim ol rekomendesen

bilong dispela Lidasip Traibunal long rausim Memba bilong Not Flai, Boka Kondra. Dispela toktok bilong nius long Nesenel Niuspepa olsem Gavana Jeneral i minim na i no mekim samting hariap em i stret nae m i giaman toktok. Mi singaut long dispela midia long em i mas putim trupela ripot na em i paulim tingting bilong ol pipel. Mi singaut long dispela midia ejensi long ripotim ol stori gut nae m i mas painimaut as bilong tok-tok gut pastaim long raitim ripot. Kain olsem nau em Gavana i no bin kisim wanpela toksave. Gavana Jeneral i no bin kisim wanpela toksave. mi toktok wantaim ol Suprim na Nesenel Kot pinis long mekim klia," Sir Tipo i tok.

Mapai Transport opim nupela opis long Nu Silan

TRANSPOT kampani bilong PNG, Mapai Transport Limited, i opim pinis nupela opis na brens bilong em long Auckland, Nu Silan.

Menesing Dairekta Jacob Luke i tok Mapai Transport i inapim rot transpot bisnis bilong em long PNG, na nau ol i laik opim nupela bisnis brens long narapela kantri.

Ol i statim wantaim nupela opis long Auckland long Nu Silan, na kampani nem bilong ol long Nu Silan em i Mapai New Zealand Limited.

Long dispela wik, Mapai Transpot i postim sampela piksa bilong nupela kar bilong



Wanpela nupela kar wantaim nupela logo bilong Mapai Nu Silan Limited long Auckland.

ol long Nu Silan long fesbuk pes bilong ol.

Mista Luke i tok ol i laik givim lojistikel sapot sevis long Nu Silan.

Em i tok sans bilong mekim transpot bisnis

long PNG i bagarap lik-lik bikos rot na bris i no stap gut na ol transpot kampani i wok long westim bikpela mani taim kar i wok ong bagarap long no gut rot.

Sampela ol kastoma bilong Mapai em, Porgera Join Vensa, SP Brewery na Coca Cola. Mista Luke i bin statim Mapai Transport long yia 1990 long Mt Hagen.

UNICEF Kantri Representativ ripot long Foren Afes

Frieda Sila Kana i raitim

NUPELA Kantri Representativ bos bilong Yunaitet Nesen Fan bilong ol Pikinini (UNICEF), Olushola Ismail i bin kamap long kantri long Me 27, na long Tunde dispela wik em i bringim ol pepa bilong em i go long opis bilong Ministri bilong Foren Afes long kisim luksave bilong wok long kantri.

Mista Olushola i bilong kantri Nigeria long Afrika na em i gat bikpela save long wok wantaim UNICEF. Long asde em i bin holim namba wan miting wantaim ol nius ripot bilong ol midia long opis bilong UNICEF. Em i tok olsem wok tru bilong em i bilong Wara na Senitesen na em i bin wok insait long 8-pela kantri pinis, pastaim long em i kam long Papua Niugini.

Em i tok olsem em i laik wok wantaim tupela bos bilong Helt na Edukesen long UNICEF opis wantaim ol dipatmen we i save lukluk helt na gutpela sindaun bilong ol pikinini olsem



Mista Olushola Ismail i bringim ol wok pepa bilong em long opis bilong Foren Afes na i sekan wantaim Minista bilong Foren Afes, Rimbink Pato long dispela wik. Foto: UNICEF Midia

Edukesen, Helt na ol narapela NGO, Intenesenel NGO na ol komyuniti.

"Edukesen na helt em i bikpela samting tru. Mipela i laik wok moa long we bilong stopim binatang bilong HIV long kalap long mama i go long pikinini. Mipela i laik strongim wok bilong nutrisen bikos i gat bikpela hevi bilong ol pikinini i no save kaikai

gut na ol i save kamap sotpela tumas.

"Taim ol i no kamap gut bai tingting bilong ol i no klia na ol i no inap long kisim gutpela skul," Mista Olushola i tok.

"Mi laik wok wantaim PNG gavman, holim han wantaim ol patna na llong painim we bilong kamapim gutpela sindaun bilong ol pikinini," em i tok.

Narapela samting em i

tok long UNICEF bai strong long mekim em long sait bilong banisim ol pikinini long ol birua na pait insait long haus na long ausait.

"Vailens i save bagarapim bodi na tingting bilong ol pikinini. Mi laik wok wantaim olgeta patna olsem ol sivel so-saiti, gavman na ol intenesenel NGO long helpim ol." Mista Olushola i tok..

Ol sumatin lusim Unitech



Vais Sensela bilong Unitech, Dokta Albert Schram

PLANTI ol sumatin bilong PNG Yunivesiti ov Teknologi (Unitech) long Lae i lusim kempas na i go bek gen long wan wan ples bilong ol.

Asde ol sumatin bilong Sentral Provins i kambek gen long Pot Mosbi na sampela ol sumatin bilong Solomon Ailan na Vanuatu tu i lusim skul na go bek gen long kantri bilong ol yet.

Ol ripot i tok ol sumatin bilong Enga Provins i go bek gen long provins long Tunde long dispela wik.

Ol papamama long Milen Be Provins i singautim Gavana Titus Philemon long salim olgeta Milen Be sumatin i go bek gen

long provins bikos sefti bilong ol sumatin long kempas i no stap gut.

Vais Sensela bilong Unitech, Dokta Albert Schram, i tokim ol leksera na ol wok manmeri bilong Unitech long kisim was na lukautim ol yet.

Dokta Schram i tok sampela ol man i brukim glas bilong kar bilong em na dispela i soim olsem laip bilong em na famili bilong em tu i no stap gut.

Ol polisman nau i wok long putim was long em na famili bilong em.

Ol ripot i tok planti sumatin i lusim skul na i ranawe i go bek gen long ples bilong ol yet.

Minista promotim turis bisnis long Milen Be

MILEN Be Provins em i wanpela stailpela provins insait long kantri we i gat bikpela sans bilong kirapim bisnis bilong turis.

Minista bilong Turisim, Ats na Kalsa, Tobias Kulang, i mekim dispela toktok long las wik long Alotau, Milen Be Provins.

Mista Kulang i bin go long Alotau long promotim wanpela polisi bilong gavman ol i kolim Turisim Zon Sapot Inisietiv (TZSI).

Dispela nupela polisi we gavman i bin kirapim em long mekim moa wok long sapotim ol wan wan ples we i gat sans long kirapim bisnis bilong turis.

Mista Kulang i tok ol dispela ples em Kokopo na Rabaul long Is Nu Briten, Alotau long Milen Be Provins na Mt Hagen long Westen Hailans Provins.

Em i tok Madang Provins tu bai go insait long TZSI program bikos gavman i luksave long Madang olsem wanpela bikpela ples long PNG we ol turis i save pulap.

“Ol wan wan provins i nidim wanpela provinsal masta plen long larim TZSI i wok gut na karim kaikai,” Mista Kulang i tok.

Mista Kulang i singaut strong i go long ol wan wan provinsal gavman long kirapim dispela plen hariap.



Ol liklik pikinini i bilas na tok welkam long ol turis i kam long bikpela krus sip long Milen Be.

Em i singautim ol hotel, ges haus, na tua kampani long wok-bung wantaim ol wokman bilong ol dispela provinsal gavman.

Mista Kulang i askim Turisim Promosen Atoriti (TPA) long kirapim wanpela turisim maketing model long helpim ol dispela provins i maketim ol turisim prodak bilong ol.

Mista Kulang i tok em i gat plen long kamapim wanpela bikpela maketing kempen long PNG na long ovasis tu wantaim.

Long Alotau, Mista Kulang i bin go lukluk raun long Tawali Leisure

na Dive Resort, na em i bin amamas stret na wanbel olsem ol samting bilong dispela risot em i intanesenel standet.

Em i luksave tu olsem planti ol turis long planti kain kain kantri long wol i save kam long Tawali na yusim ol fasiliti na ol samting bilong dispela risot.

Dispela em i bin wanpela gutpela samting we turism maket long Milen Be i ken givim long ol turis husat i laik go raun long hap.

Mista Kulang i luksave tu olsem Milen Be i gat ol gutpela ples balus, sip bris, rot na arapela ol

samting long sapotim turis bisnis.

“Planti ol hotel, los na ges haus em ol intenesenel standet. Pasin bilong ol manmeri tu em i gutpela tru,” Mista Kulang i tok.

Em i tok planti ol bikpela krus sip i save kam raun long Milen Be, na long dispela yia tasol 34 krus sip i kam pinis. Long tupela wik i go pinis, Mista Kulang i bin tok aut olsem em bai bungim ol manmeri long turisim indastri long Hailans rijon long kisim tingting na kirapim wanpela turisim maketing polisi.

Em i bin bungim planti wok manmeri bilong ol provinsal gavman, ol turisim opereta na ol wok manmeri bilong TPA i bin bung long wanpela woksop we Mista Kulang i bin holim long Kundiawa, Simbu Provins.

Long dispela woksop, Mista Kulang i tok ol bai stretim ol pepa wok long larim Hailans rijon i mekim moa bisnis bilong turis.

Em i tok i gat bikpela sans long kirapim bisnis bilong turis tasol i gat bikpela wok i stap long mekim long kirapim turisim maket long larim ol turis i kam raun long hailans.

“Aninit long lukluk bilong mi olsem nupela Minista bilong Kalsa, Ats na Turisim, mipela i lukluk long kirapim nupela sistem long kamapim ol gutpela samting long maketim turis bisnis na pulim moa turis i kam long Hailans.

“Long dispela as tasol, mipela bai holim wanpela bikpela bung bilong ol turis bisnis opereta, ol provinsal gavman opisal na distrik developmen atoriti long Hailans rijon.

Dispela bung em i namba wan taim kain bung i kamap. Long dispela bung ol bai sekim wanem kain ol samting bilong mekim turis bisnis i stap long wan wan provins long Hailans rijon.

“Mipela bai bungim dispela olgeta na kirapim maket bilong turis long pulim moa turis i kam insait long Hailans,” Mista Kulang i tok.

“Yumi Hailans manmeri i gat planti kainkain bilas na pasin tum-buna. Dispela i ken pulim moa turis i kam insait.

“Kalsa bilong yumi em i samting. Em i strongpela tru na yumi holim i stap yet. Kain kain bilas bilong yumi i ken pulim moa turis i kam. Dispelaem ol sampela poin em mipela bai bung na toktok moa long en.



TribeFM Teen Ekselens Awot 2016

Nominetim ‘Teen Hero’ bilong yu
Yu save long wanpela yangpela man o meri husat i soim pasin bilong lidasip na save long planti wok insait long komyuniti?

2016 nupela TribeFM Teen Ekselens Awod bai selebretim 7-pela yangpela man na meri bilong olgeta hap bilong Papua Niugini, krismas bilong ol namel long 13 na 19 husat i soim olsem ol i gro o senisim pasin, lidasip na ol i gat komitmen long komyuniti ol i stap long en.

OL KATEGORI NA KRAITIRIA

Ol nomini i mas soim ol ko veliu bilong gro o senisim pasin, lidasip na komitmen.

HELT NA WELFE

Dispela yangpela man o meri bai soim olsem em i gat strongpela pasin bilong kamapim gut helt bilong em na bilong ol narapela husat i stap insait long komyuniti bilong ol wantaim ol aktiviti we i save strongim ol tingting na pasin bilong gutpela helt long ol skul, famili na ol komyuniti grup.

MUSIK NA ATS

Em bai soim olsem dispela yangpela man o meri i gat namba wan kain save na stail bilong ats na music na sapela taim em i yusim long kamapim senis insait long ol komyuniti bilong em.

SPOT

Dispela yangpela man o meri bai soim gutpela pasin bilong stap strong long spots na i pilai gut tru na em i yusim save na stail bilong em long kamapim gutpela sindaun long komyuniti.

KOMYUNITI

Dispela yangpela man o meri i soim olsem em i save tingim nid bilong ol narapela pipel pastaim long em yet, na em i save givim ol taim bilong em yet na strong bilong em long helpim komyuniti bilong em.

EDUKESEN

Dispela yangpela man o meri husat i soim olsem em i save mekim gut long edukesen bilong em o i kamap gut long skul bilong em, o husat i gat stori long em i save helpim ol narapela lain long lainim samting.

BISNIS NA INOVESEN

Dispela yangpela man o meri i mas soim olsem em i save painim ol nupela kain we bilong wokim samting na i mekim wanpela wok bisnis we i helpim em yet na komyuniti bilong en.

DISABILITI

Dispela yangpela man o meri i mekim senis long helpim ol lain husat i gat disability, na tu ol yangpela man na meri husat i gat disability tasol i wok long senisim laip bilong ol yet na bilong komyuniti tu.

WEI BILONG NOMINETIM MAN

Pulimapim dispela fom wantaim olgeta stori bilong wanem yangpela man o meri yu laik nominetim. Sapos yu lusim sampela hap bai mipela i no inap kisim fom bilong yu.

Ol entri i MAS kam insait long 5 klok apinun long Fraide 22 Julai 2016.

Pliis givim fom bilong yu i go long TRIBE 92FM long wanpela bilong ol dispela kain wei:
Salim pas: Tribe92FM, NBC, P O Box 1359, Boroko, Port Moresby, PNG.
Yu yet bringim i go long wanpela provinsal NBC OPIS klostu long yu
Salim long Fesbuk pes bilong TribeFM (salim wanpela poto bilong fom yu pulimapim pinis)
Salim long Whatsapp i go long 70199105 (salim wanpela poto bilong fom yu pulimapim pinis)
Yu ken ring long telepon namba 325 3439 namel long 8.30 moning taim i go long 4.30 long apinun, Mande i go Fraide o salim email long wgorogo@nbc.gov.pg.

NOMINETIM ‘TEEN HERO’ BILONG YU LONG NUPELA TRIBE92FM TEEN EKSELENS AWOT

Pliis TIKIM WANPELA bilong ol dispela kategori long nominetim TEEN HERO bilong yu:

- ★ HELT NA WELFE
- ★ EDUKESEN
- ★ DISABILITI
- ★ SPOT
- ★ KOMYUNITI
- ★ BISNIS NA INOVESEN
- ★ MUSIK NA ATS

STORI BILONG NOMINI (Teen Hero):

Nem bilong em: _____

Adres bilong em: _____

Bon De: _____

Fon namba bilong em: _____

STORI BILONG NOMINETA:

Nem bilong em: _____

Rilesensip bilong Teen Hero bilong yu wantaim yu (papamama, tisa, Sios lida): _____

Adres bilong yu: _____

Fon namba bilong yu: _____

Long narapela hap pepa, tok klia long wanem as na Teen Hero bilong yu i mas kisim luksave long dispela yia Awot bilong TTEA. Pasim dispela pepa wantaim dispela fom.

Yu **MAS** soim klia ol **sampela eksampel** bilong soim wok we dispela yangpela man o meri i soim long gro bilong em yet, lidasip na komitmen long kategori yu wok long nominetim em.

Ol Lo bilong go insait:

- Em i op long olgeta lain i stap insait long PNG
- Krismas bilong ol nomini i mas stap namel long 13-19
- I ken nominetim ol grup/tim
- Ol nominesen i mas stret na i kam stret long yu
- TribeFM bai makim sampela lain long skelim na makim
- Sapos ol jas i lukim olsem i no gat gutpela lain long wanpela kategori, bai i no gat awot long dispela kategori
- Ol lain i stap long fainel mak bai kisim toksave long telepon
- Ol wina bai kisim awot/fainensel sponsasip we bai ol i mas yusim gen long wanem kategori ol i win long en
- Nem na poto bilong ol wina bai kamap long ol media

Sapot i kam long:



Nupela klasrum long Nu Rok rot

Paulus Tali i raitim

Tupela wik i go pinis long Bek Rot long Lae Siti, Aihi Lokal Level Gavman Nurok,

i opim nupela 3, dabol klasrum bilong ol pikinini we bai ol inap skul long elementri

skul long SDA Misin. Planti pipel long komyuniti i kamap na amamasim dispela taim. Makim maus bilong Morobe Gavana, Kelly Naru em Kasiga Naru, i kamap.

Menesa i go pas long Sios patnasip program, (CPP) Firife Erenuka, i tok, CPP em bilong kain kain sios, long kisim helpim na i no bilong Lutheran tasol, taim yupela bin kamap long askim long helpim mipela i bin givim bikos opis em bilong helpim na i no bilong wanpela lotu tasol.

Bod Siaman bilong Nu

Rok, Elementri skul, Aisi Ginao, husait tok rot bilong askim long mani long kamapim samting em i no isi, tasol yumi mas tenkyu long God, long wok bung bai olgeta samting kamap long mak bilong em, na nau yumi lukim kaikai bilong em wantaim mani bilong CPP.

Mista Aisi, husait tok moa olsem, pasin bilong wok bung bai mekim olgeta samting inap long kamap gut, maski long yumi tok pait tasol wok bung tasol inap long bungim yumi olgeta. Mipela i laik tok tenyu long Menesa Firife Erenuka, long givim mipela K5,000. Wantaim dispela mani mipela i kirapim namba wan biling, nau mipela i pinisim tripela gen klasrum mipela laik tok amamas long wok bung bilong Patnasip opis."

Bilum Buk i skulim moa tisa

BILUM Books, kampani we i wok long kamapim ol buk bilong Standet Bes Edukesen Karikulum nau i skulim moa tisa long Wewak.

Bilum Buk i skulim moa long 60 tisa insait long tupela woksop long Wewak we ol i lainim moa long foniks we bilong kolim ol wod, vobekuleri, speling na stadi long wod long St Mary Praimeri skul.

Ol tisa i gat bikipela laik tru long lainim foniks na ol wod we ol i save yusim planti taim insait long nupela Elementri Inglis Silabas.

Ol gutpela tingting na askim bilong ol i soim olsem ol i amamas long lainim wanem samting ol inap long lainim long skulim ol pikinini long foniks na ol wod ol i save kolim olgeta taim.

Dispela bai helpim ol sumatin long kamap ol gutpela lain bilong rit na raitim ol wod. Long taim bilong woksop i pinis, ol tisa i sekim gen ol samting ol i lainim long NDoE Elementri Standet Bes Silabas.

Sampela toktok bilong ol tisa i olsem: "Woksop i helpim mi long klia gut long wei bilong kolim ol foniks na ol wod we i save kamap planti taim". Narapela i tok, "Mi laikim dispela woksop bikos em i givim mi planti aida long wei bilong yusim Standet Bes Karikalama". Na narapela moa i tok, "dispela woksop i helpim mi long kisim moa save long mi ken go bek long skul na redim ol pikinini bilong mi long go insait long lainim Tok Inglis wantaim foniks na ol wod."

"Tupela woksop mi bin go long en i helpim mi long planti kain wei long skulim ol foniks na ol wod we i save kamap planti taim. Mi amamas long kam."

Menesa Erenuka, i tok, "Mi laik tok amamas long yupela komyuniti na ol tisa, bilong Nu rok, Elementri skul, long kamapim wanbel na wokabaut wantaim skul bai inap stap long taim long sapot bilong yupela tasol, mi bilip skul nau stap long blok, em bai isi moa pastaim ol pikinini save go long PTC, na Bumayong, we em i longwe tumas. Nu Rok bai isi moa long yupela papamama long bringim pikinini i kam skul.

OL nupela greduet tisa i mas salim ol setifiket na ol pepa bilong ol i kam hariap long edukesen dipatment long perol divisen na bai ol i ken stap long pei rol.

Ekting Seketeri bilong Dipatmen bilong Edukesen i laikim olgeta provinsal edukesen edvaisa, ol het tisa, menesa na ol prinsipel bilong ol elementeri, praimer i na sekenderi skul na vokesenel senta long salim ol pepa bilong ol nupela greduet tisa hariap pastaim long pinis bilong mun Jun.

Em i mekim singaut long ol lain tisa husait bin kisim diploma o digri bilong ol long ol tisa koles we i gat luksave na tok orait bilong gavman, na ol i wok long tis i stap long ol skul taso i no kisim pe yet.

Dispela singaut i bihainim wanpela sekula o pas we i bin go aut long opis bilong Seketeri long de 31 Mei 2016, sekula namba 17/2016 long ol provinsal atoriti long mekim samting.

Dokta Kombra i tok strong olsem nupela greduet tisa i mas stap

long perol nau. Em i tokaut olsem nau yet i gat 443 bilong ol nupela tisa we i no stap long perol i kami nap long Jun 1, 2016 bikos ol pepa bilong ol i no kamap long Edukesen Dipatmen perol opis.

Ol pepa we i mas kamap em long ol tisa registresen setifiket, Tisa Rekot bilong apoinmen; na kopi bilong gret 10 na gret 12 setifiket.

Antap long dispela, Ekting Seketeri i tok olsem ol nupela tisa husait i greduet long ol narapela yunivesiti na i wok long tis i stap nau,

na i kisim mak bilong dipatmen em ol i mas givim ol pepa bilong ol tu long wanem kwalifikesen long tis ol i gat wankain olsem ol narapela we i greduet long ol koles we gavman i tok orait long ol. Em sapos ol i no wok long kisim potnait pei bilong ol yet.

Dokta Kombra i tok i gat lista bilong ol nupela greduet we i no stap long perol stat long dispela yia em i go long ol wan wan skul na long ol provisal atoriti long stat bilong mun Jun pinis.

Rurel skul wokim 5-ya plen



Klasrum long Santu Stella Sibog praimer i skul i nidim gutpela senis. Foto: James Kila.

James G. Kila i raitim

SANTU Stella Sibog praimer i skul we i stap longwe tru insait long rurel eria long Raikos distrik i wok hat stret long painim helpim long wokim tripela dabol klasrum na ol arapela samting long skul long sevim ol sumatin na pikinini long dispela eria.

Santu Stella Sibog praimer i skul i bin kamap long 1983 na rejista wantaim Nesanel Edukesin Dipatmen na i go aninit long lukaut bilong Katolik Edukesen ejensi long Madang.

Skul i stap insait long wod 12 long Saidor lokal level gavman long Raikos distrik. Tasol bihain long moa long 33 yia dispela skul i no lukim gutpela senis long sait long klasrum na ol haus tisa.

Olsem na ol tisa wantaim

bod i redim wanpela Faiv Yia Dvelopmen plen long traim painim helpim long wokim kamap ol klasrum, haus bilong ol tisa na ol haus-slip bilong ol sumatin long skul.

Ol tisa long Sibog praimer i skul i save bungim kisim hatpela taim stret long sait long kisim ol gavman sevis na tu ol helpim long sait long sapotim ol yet long wok.

Ol i save peim K70 bot fea long go long Madang taun long wokim ol edmin wok na baim ol samting bilong ol.

Bihain ol i save peim narapela K70 long bringim ol i go bek long Galek long nambis na bihain ol i save wokabaut karim kago na bihainim maunten i go antap.

Em longpela rot olsem seven kilomita na i save kisim olsem samting olsem. Long apinun taim bikipela klaut i

save karamapim ples na em save kol stret.

Sibog praimer i skul i gat ol sumatin i wokim gret 3 i go gret 8, tasol ol sumatin i no yusim ol gutpela klasrum we i orait long ol i sindaun long en na kisim gutpela edukesen.

Ol klasrum long Sibog em wol bilong ol em ol wokim long mambu blain na wanwan kapa ruf tasol.

Insait long projek plening miting bilong dispela Faiv Yia Dvelopmen Plen bilong Sibog praimer i skul.

Ol komiti i kamap wantaim plen olsem long 2016 ol bai wokim kamap wanpela dabol klasrum wantaim wanpela haus tisa em kos bilong en em K500,000; long 2017 em ol bai wokim narapela dabol klasrum gen wantaim tupela haus tisa em kos bilong en em K500,000; na long 2018 tu em ol plen long wokim kamap

wanpela dabol klasrum wantaim tupela haus tisa em kos bilong en em K500,000; long 2019 em ol plen long wokim kamap wanpela edministresin biling na wanpela stoarum em kos bilong en K500,000 na long 2020 em ol plen long wokim kamap wanpela domitori bilong ol sumatin man na wanpela domitori (haus-slip) bilong ol meri sumatin em kos bilong dispela em K500,000.

Jack Kaleke bilong Drai Diwai Konsaltensi Sevises i tokaut olsem olgeta dispela projek em ol i plenim long kamap insait long faiv-ya plen, na ol kos bilong olgeta wok kamap insait long dispela faivpela yia em K2.5 milien.

Mista Kaleke i tokaut olsem ol sabmisiin long kisim fainensol helpim em ol bai salim i go long ol dona ejensi na tu kopi bilong en bai go long Raikos distrik edministresin.



INVESTMENT TOKTOK with DR. STEPHEN NASH

Taim bilong UK i lusim Yuropien Yunien (EU), o "Brexit"

Sapos yu gat askim, plis salim i kam long toktoksuper@nambawansuper.com.pg na mipela bai bekim.

Long dispela taim, Yunaitet Kingdom (UK) i bin kisim vot long ol bai stap wantaim Yuropien Yunien yet o no gat. Planti i bin tok pait olsem em UK bai bagarap sapos em i bruk lusim EU, tasol i luk olsem UK i go ausait long EU, em i bagarapim tru EU na i no UK. Sampela ol bagarap we i kamap nau yet em i kamap long fainensel maket prais, i kamap olsem:

- **Mani:** Sterling (GBP) i lusim strong bilong en moa long 12 pesen. Wankain olsem olgeta bikpela mani long wol, em i wok long lusim strong bilong en, bilong em i ken salim ol eksport bilong en isi, na dispela em i gutpela piksa long UK,
- **Inflesen:** Taim strong bilong GBP i go daun, em bai apim prais bilong ol samting bilong salim. Olsem na taim EU bai lukim ol mani mak bilong ol samting bilong salim i go daun, UK bai wok long pait wantaim wanpela samting we em isi long stretim; inflesen,
- **Ol ikwiti prais:** Ol sea prais bilong French i pundaun moa long tupela taim moa long pundaun bilong UK sea prais, na
- **Bon prais:** Ol bon prais bilong French i pundaun daunbilo moa long GBP bon prais, maski i gat tingting bilong wanpela kredit reit ejensi daunim mak bilong en moa long UK.

Taim UK i lusim EU, em bai gat gutpela sans long wokim ol polisi bilong en isi, na em i gutpela bilong kantri, na UK bai sevim bikpela mani long ol fanding em i save givim go long EU na long fanding bikpela opis bilong EU.

Tasol, lukluk nau i stap long EU, na i no long UK, bikos long ol hevi we EU i gat yet long planti yia i kam, nau i stap long ples klia, olsem:

- Strong bilong mani long EU i pundaun, olsem mak bilong bon maket i soim na long German Bund (bon) we ol i kisim ziro mak, na
- Benk sistem i no gat mani, sampela benk sea prais i bin stap daunbilo tru long mun Februeri 2016, pastaim long Brexit vot i kamap, na gen em i kisim taim long go daun moa bihain long vot i kamap.

Ol dispela olpela, na bikpela hevi nau i go insait long narapela nupela hevi olgeta; em vot bilong Brexit. Em i no isi long save long wanem samting bai kamap long bihain, tasol yu ken lainim samting long ol hevi we i kamap pinis long bipo, na bihanim dispela bai stap ples klia:

- Wanpela memba bilong EU, kain olsem Greece, nau bai kisim strongpela tingting long go aut tu lusim EU, tasol hevi bilong Greece em ol i gat dinau bilong IMF ai helpim ol i stap yet, we ol i bin hat long bekim long sampela taim nau, na
- Ol hatwok i stap long Yuropien benking sistem bai stap yet na bai kamap strong aninit long hevi bilong ol sea prais bilong ol Yuropien benk i wok long pundaun yet. i go long sampela taim bihain bai ol i gat nid long painim moa mani bilong ol lain husat i bosim wok bilong EU, ating long taim we ol benk bai hat long bekim. Em bai ol i no inap long abrusim, ol bikpela Yuropien benk long kam bung wantaim, na wantaim dispela bai ol i lusim luksave bilong ol olsem benk bilong kantri bilong olyet. Wanpela Deutsche benk, ating bai kamap olsem Deutsche-UBS, o Deutsche-Santander. Bai yumi ken tok olsem, ol benk bai kamap ol namba wan lain, long go het long ansa bilong ol, em, long Yurop; wanpela bikpela yunien, na ating bai kamap wanpela politikal yunien, na i no hap, hap olsem nau em i stap.

Yurop i lukluk long Yunaitet Stets (US), wantaim ol narapela, long kisim gutpela tinting long taim ol kamapim komon maket nan au EU. Tasol, EU i go tasol long hap rot tasol long traime long kamap olsem US. Hap, Yunien tasol, em i luk olsem bai i no inap, bikos em i kamap ol hevi bilong kisim mani long ol kain kain kantri tu long kam klia. Wanpela Stet i no save bilip long narapela, long kisim mani, na political yunien, na i no rausim kain tingting bilong no gat bilip, na bai em i no inap wok gut, long bagarapim mani bilong kantri.

Namel long nau na long taim bilong politikal solusen bilong EU i kamap ples klia, yu ken lukim olsem bai i gat sampela hevi i go yet, we bai mekim ikwiti maket i go slek gen, na tu long ol dinau bai go planti. Tasol sori tru olsem dispela kain samting em i no ken kamap long nupela kantri olsem PNG long wok wantaim US dola (USD maket).

Olsem na ol hevi bilong Yurop bai kamapim bikpela tenis we i no gutpela tumas long ol narapela kantri olsem PNG, na long global ikonomi tu, taim i no gat bikpela gro i kamap long olpela wol ikonomi.

ICRC skulim ol soldia long UN Piskiping Operesen



Ol soldia bilong 1RPIR bilong Taurama Bareks i harim toktok long Mari Bareks.

I N T E N E S E N A L
Komyuniti bilong Red Kros (ICRC) i bin givim ol tok stia bilong Yunaitet Nesens (UN) long ol na PNG Difens Fos (PNGDF) soldia long wanem kain wei ol bai wok sapos ol i go insait long ol ples we pait i stap, long bringim bel isi long ol ples we pait i stap.

"Em i bikpela samting long ol Papua Niugini soldia long kisim gutpela tingting bilong Intenesenel Humeniterien Lo (IHL) pastaim long ol i go long UN Piskiping," Lt Col Edison Napyo, Komanda bilong Tau-

rama Bareks i tok.

Lt Col Napyo i bin toktok long taim 700 soldia bilong PNGDF Namba wan Royol Pasifik Ailan Rejimen (1RPIR) long Taurama Bareks long Pot Mosbi long taim bilong ol i kisim tok stia bilong IHL long Intenesenel Komiti bilong Red Kros (ICRC).

"Ol toktok bilong ICRC em i bikpela samting bikos ol i save helpim fos long tingting long ol intenesenel lo bilong ples pait," Lt Col Napyo i tok.

"Ol soldai bilong mipela i mas gat wankain save olsem

ol narapela kantri na mipela i amamas long ICRC long sapotim mipela long dispela samting."

Faivpela PNGDF kampani i bin kisim training bilong bodi na ol narapela training bilong kisim IHL toktok bilong ICRC Komuniti Kesen Deliget, Dan Waites long 20-22 Jun. Sampela bilong ol dispela 700 fran lain soldia bai i go long Sudan long dispela yia na tu long ol narapela hap we i gat pait na birua i stap long en.

ICRC, i gat bikpela tingting long developim na promotim IHL, na i save holim ol

dispela kain toktok bilong pis kiping fos long ol kantri long wol. Ol i givim ol toktok bilong banisim na lukautim ol pipel long hap bilong pait, wok bilong ICRC, na ol prinsipel bilong pasin bilong bihainim lo long hap we ol birua i stap long en.

"Mipela i amamas long helpim PNGDF wantaim training bilong IHL," Mark Kessler, ICRC Het ov Misin long Pot Mosbi i tok.

"Em i gutpela sain bilong komitmen na profesionalisem ol i singautim mipela long givim ol long dispela yia." Em i tok.

Nupela UNICEF bos bungim ol nius ripota



Mista Olushola Ismail i toktok wantaim ol nius ripota long asde.

Poto: UNICEF midia.

NUPELA PNG kantri opis bos bilong Yunaitet Nesens Fan bilong ol Pikinini (UNICEF), Olushola Ismail i tokaut olsem em i laik wok wantaim ol niusman na meri long strongim wok bilong helpim ol pikinini long Papua Niugini.

Mista Olushola i singautim wanpela bung bilong ol nius ripota bilong ol PNG midia long Pot Mosbi long asde, Trinde insait long opis bilong UNICEF long Delloite Tawa long Pot Mosbi. Mista Olushola Ismail i gat 25 yia eksperiens long wok wantaim UNICEF wantaim developmen program na Humeniterien program insait long 8-pela kantri. Em i bilong kantri Nige-

ria. Ol wok bilong em i bin stap long Nigeria, India, Iraq, Maldives, Iran, Sudan, Uganda na Afghanistan.

Pastaim long em i kisim dispela wok, em i bin save wok olsem Sif ov Fil Operesens na Imejensi Kodinesen long UNICEF Afghanistan we em i save bosim wok bilong kodinetim na givim tok stia na lidasip long 5-pela zonal opis na 10-pela autpos long mekim ol kain kain wok bilong UNICEF. Pastaim long em i go long Afghanistan em i bin wok olsem Kodineta bilong UNICEF Darful Opis we em i lukautim olgeta wok bilong edvokasi, kodinesen na menesmen bilong Gavman bilong Sudan na

UNICEF program long helpim ol meri na pikinini insait long Darful rijon.

Namel long 1991 na 2009 em i bin wok long kain kain wok insait long UNICEF.

Mista Olushola i bin go pas long UNICEF rilif wok wantaim humaniterien komyuniti long sapotim gavman long Noten Yuganda, Syria, Jordan na Kuwait.

Em i kisim wok bilong em olsem bos bilong UNICEF long PNG long Me 27, 2016. Em i laik wok gut wantaim Gavman, strongim ol patnasip wantiam ol stekholda na ol narapela UN ejensi long Papua Niugini.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIGGER, BETTER, SAFER,
STRONGER AND STILL NUMBER 1**

Kilim dokta em i pasin no gut tru

NESENEL Dokta Asosiesen (NDA) i tok long dai bilong Dokta Alphonse Benjamin Rongap, Senia long las wik Sarere, long Lae olsem em i pasin bilong ol kanaka na wail man stret.

Dokta Rongap Senia em i Vais Presiden bilong Nesenel Dokta Asosiesen, na senia pidiatrisen o dokta bilong ol pikinini na em i save wok long Angau Haus sik, tasol em i lusim laip taim ol stil man i sutim em long gan long bak-sait rot bilong Lae Siti.

Tai ol i kisim i kam long Angau Memoriel Haus sik, ol i tok em i dai pinis.



Dokta James Naipao, Presiden bilong Nesenel Dokta Asosiesen.

NDA Presiden Dokta James Naipao i tok NDA i lusim wanpela strongpela na bikpela lida insait long yunien wok na long helt insait

long Papua Niugini.

“NDA i tok dispela pasin em i rabis pasin tru long lusim laip insait long kain pasin bilong pait na kilim man olsem na tu long kilim wanpela senia dokta olsem long Lae Siti em i pasin bilong ol wail man,” Dokta Naipao tok.

“Em i taim bilong wari na sori, na ol prea bilong mipela na tok sori i go long ol family bilong Leit Senia Rongap long lusim wanpela strongpela lida, dokta, yunien lida, tisa, menta, papa na gutpela dokta bilong ol pikinini,” em i tok.

“Ol raskol i kilim nating tru na kisim laip bilong wanpela man we

i givim planti helpim long ol pipel inap 35 yia olgeta long helt na long ol narapela wok insait long dispela kantri na kain pasin yumi no ken larim i go nating,” em i tok.

“Olgeta ligel na atoriti na Lae komyuniti i mas wok hat wantiam long painim ol dispeal trabel man,” Dokta Naipao i tok.

“Long soim bel kros bilong ol na rispek long Leit Dokta Rongap Senia, olgeta klinik sevis long Angau Haus sik i bin pas na ol i larim imejensi tasol i op,” em i tok.

Dokta Naipao i tok ol memba bilong asosiesen husat i save stap long Angau Haus sik bai lukluk

imejensi keis tasol inap ol komyuniti i painim na ol polis holim pasim ol trabel man husat i kamapim dispela dai.

Long wankain taim tu, Seketeri bilong Dipatmen bilong Helt, Pascoe Kase i tok kain pasin bilong kilim wanpela papa na speselis dokta we kantri i nidim tru em i wanpela pasin nogut tru.

“Dispela nesen na ol pipel i lusim wanpela bikpela man bilong helpim ol pikinini bilong yumi,” Mista Kase i tok.

“Sol bilong em i ken malolo gut long bel isi bilong oltaim, oltaim,” Mista Kase i tok.

CHM Grup holim bikpela moning ti

Chin H Meen (CHM) Grup i soim sapot bilong ol long PNG Kensa Faundesen wantaim fanresing Bikpela Moning Ti long Fraide Jun 3 insait long het opis bilong ol long CHM Koporet Pak Wan long Gordons.

Ol CHM wokmeri i bin kukim ol kek na ol switpela bikset samting long serim na long kamapim mani long wan wan kap ti na tu long wanpela rafel tiket dro ol i bin wokim long kamapim mani bilong faundesen.

Long dispela taim bilong ti taim bilong ol, PNG Kensa Faundesen memba i toktok long sampela awenes wantaim edukesen program bilong ol long visen long daunim hevi bilong kensa long PNG.

Ol topic we ol i toktok long en em kensa long maus, seviks, na susu kensa. Ol wokman na wokmeri bilong CHM na ol lain i no wok insait tu sampela we i bin gat sampela stori bilong ol wantaim kensa long pastaim i bin wokim ol donesen long dispela taim.

Ol Dairekta bilong CHM



Moning Ti-1 CHM Grup Dairekta, Raymond na Grace Chin wantaim PNG Kensa Faundesen memba, Helen Hukula, Oda Tau na Jimmy Segodi.

Grup, Mista na Misis Chin i givim ol mani we ol i bin kamapim i go long Jimmy Segodi na Sista Helen Hukula

na tok tenkyu long ol i skulim ol CHM tim long stap gutpela na helt laip long pasim rot bilong sik kensa, na tok ol bai

helpim yet long sampela kain we long ol kempen bilong PNG Kensa Faundesen long bihain taim.

ANGAU Memoriel haus sik kisim kol rum

ANGAU Haus sik long Lae, Morobe Provins nau i gat nupela kol rum we ol i ken karim i go long wanem sikman insait long wod i gat nid long en.

Dispela kol rum em i kamap long helpim bilong Australia gavman. Em bai kamapim moa ples long ol sikman na sikmeri inap long putim kaikai bilong ol we bai kaikai i no inap long bagarap. Dispela bai helpim haus sik tu long ol inap gat ol fres kaikai long givim long ol siklain.

ANGAU haus sik haus kuk i save kukim kaikai bilong moa long 450 sikman na meri insait long haus sik na wanpela kain rum we ol inap karim i go i kam em i wanpela bilong ol gutpela samting we i kamap long inapim masta plen bilong ANGAU haus sik.

ANGAU Haus sik Sif Eksekutiv Opisa, Dokta Kenyhercz, i tok tenkyu long Australia Gavman long helpim bilong ol, long taim ol i givim dispela kul rum i go.

“Mipela i bin lukim planti bikpela senis i kamap long haus sik insait long sotpela taim. Insait long sampela wik tasol mipela i bin kisim wanpeal nupela foklip, bet-frem long ol yunit bilong ol woklain, bipela apgret bilong ilektrisiti nau kol rum bilong haus kuk.

Ol wokman na wokmeri bilong mipela na ol siklain bai kisim bikpela helpim tru long dispela,” Dokta Kenyhercz i tok.

Australia Hai Komisina Minista Kaunsela, Benedict David i tok, bai i gat sampela moa apgret bilong ol infrastraksa bilong haus sik we bai kamap yet.

“Insait long olm un i kam, mipela bai kisim olnupela medikal ikwipmen, wanpela nupela dental klinik na ekstensen bilong Intesiv Ke Yunt.” Em i tok.



CHM wokman na meri wantaim ol PNG Kensa Faundesen wokman na wokmeri, na ol narapela lain ol i singautim long kam na long sapotim Bikpela Moning Ti fanresing na awenes kempen.



Nupela kol rum i kam long ANGAU Memoriel Haus sik. Poto: AHC Media



Yut, Meri na Famili

Pastor Barbara Lunge

Trupela lida i gat nem long bihain taim

LEGESI o stori bilong wanpela man o meri long bihain taim i save stori long wanem kain we wanpela lida i go pas na mekim wok long ol pipel na planti taim em i save lusim gutpela stori bihain long ol narapela lain i laik bihainim em.

Gutpela Sindaun 29:2 "Long taim ol stret-pela man i bosim kantri, olgeta manmeri i save amamas. Tasol sapos man bilong mekim pasin nogut i bosim kantri, olgeta manmeri i save bel hevi tumas na kraai nogut."

Strepela man bai lukim olsem olgeta pipel i stap long wankain mak na kisim ol wankain skel bilong ol samting na lukautim olgeta long wankain pasin

"Taim ol stretpela man i kamap bosman bilong kantri, olgeta manmeri i save belgut na amamas tru. Tasol sapos ol man nogut i kamap bosman, orait ol manmeri i save hait long ol" Gutpela Sindaun 28:12.

Papua Niugini em i wanpela kantri we i gat planti yangpela lida wantaim gutpela tingting i stap.

I gat tupela kain lida, lida we ol i baim em, bai kirap long strongim em yet tasol. Tasol lida husat i gat gutpela stori long bihain taim em dispela lida we i gat laik long helpim ol narapela long inapim olgeta driman bilong ol.

"Mi yet mi gutpela waman bilong ol sipsip. Gutpela wasman bilong sipsip em i save lusim laip bilong em yet bilong helpim ol sipsip. Sapos man i wok mani tasol, nae m i no wasman tru bilong ol sipsip, nae m i no papa bilong ol sipsip, orait taim em i lukim weldok i kam, em bai i lusiim ol sipsip na ranawe. Na weldok bai i kaikaikim ol sipsip na ranim ol i go nabaut. Dispela man bai i mekim olsem, long wanem, em i wok long kisim pe tasol. Em i no tingting tru long ol sipsip." Jon 10:11-13. Insait long dispela stori, wanpela wasman bilong sipsip husat i save lukautim gut ol sipsip, i save banisim ol gut na mekim gut long ol.

I gat planti eksampel insait long Baibel long ol biknem lida husat i go pas long ol lain bilong ol na lusim gutpela stori bilong ol, kain olsem King Solomon em i wanpela king husat i gat gutpela tingting na save. "God i givim planti gutpela tingting na save long Solomon. Em i gat planti save tumas olsem wesan long nambis na man i no inap kaunim. Gutpela tingting na save bilong en i winim save bilong ol saveman bilong hap sankamap na bilong ol saveman bilong Isip." 1 King 4:29-30

Ol pipel i save kam long harim gutpela save bilong King Solomon.

Mi bilip olsem Papua Niugini em i wanpela kantri i gat tok promis o kavanen na klostu taim bai God i kamapim ol lida man we i no gat pret long kisim kantri bilong yumi i go insait long nupela millennium.

"Sapos ol manmeri i bihainim stretpela pasin, bai kantri i gat biknem. Tasol sapos ol i mekim sin, bai ol i sem moa yet." Gutpela Sindaun 14:34.

God i ken blesim PNG.

Kopret tenks giving dina bilong ECPNG sios

ECPNG Sios bai mekim wanpela bikpela kopret tenks giving dina long dispela wik Trinde long Gateway Hotel long Pot Mosbi.

Nesenel Presiden bilong ECPNG, Reveren Hengebe Himugu, i tok dispela kopret tenks giving dina bai kamap long kisim fan resing mani long

sapotim ol wok bilong sios.

ECPNG sios i save kisim sapot long planti ol biknem kampani long PNG olsem Oil Serach, MRDC, Curtain Bros, Trans Wonderland, na HGDC.

Long dispela kopret tenks giving dina, ol manmeri na bisnis haus husat i laik sapotim ol sios wok bilong ECPNG i ken givim donesen mani.

Ol bai salim ol kopret tebol na ol bisnis haus i ken baim dispela ol tebol na sapotim wok misin bilong ECPNG sios.

ECPNG sios i gat planti sios long Westen, Hela na Sauten Hailans Provins. Long Pot Mosbi tu em i gat planti sios.

Wok misin bilong sios i wok long gro na ECPNG i nau kirapim ol nupela sios long Enga,

Westen Hailans, Morobe, Madang, Wes Sepik, na Is Nu Briten provins.

Em i gat wanpela patnasip agrimen wantaim wanpela sios long Wes Papua long Indonesia.

ECPNG i save sapotim na salim ol misineri manmeri i go long ol ovasis kantri.

Ol wok redi long selebretim 130 krismas bilong ELC/PNG

Paulus Tali i raitim

OL wok redi i go het nau long selebretim 130 krismas bilong Evanjelikel Luteran Sios (ELC/PNG) long Julai 12.

ELC/PNG aninit Hetbisop, Reveren Jack Urame na Jeneral Seketeri, Bernard Kaisom, i bin makim Roy Miringke MBE olsem Nesenal Ivens Kodineta insait long sios long kodinetim olgeta sios iven na program.

Em bai wok klostu wantaim Evangelisim Dipatment Seketeri, Reveren Elymas Bakung long karim aut olgeta iven pro-

gram i mas kamap gut.

Mista Miringke na ol teknikel tim i wok pinis long kamapim ol program bilong ol iven bai kamap, na ol i lukluk long fanresing bilong Julai 12.

Long wankain taim, ELC/PNG i luksave long ol sios hetman bilong ol na wok bung gut wantaim ol long sapotim na strongim ol wok bilong sios.

Mista Miringke, i tok ol pikinini Luteran insait long dispela kantri i kisim blesing bilong sios i mas save olsem ol i pikinini bilong God, long sios Luteran.

"Long kamap bilong yu

olsem pikinini bilong Luteran, yu mas tok tenyu long sios bilong yu long bikpela hat wok ol tumbuna na misineri i mekim na yumi wan wan nau i kamap olsem memba bilong ELC/PNG. Olsem na long tingim sios bilong yu long Julai 12, yu ken tok tenkyu go long God na amamas na presim nem bilong God Papa.

"Yumi wan wan no nap long kamap olsem tasol long wok Gutnius yumi nau kamap pikinini bilong God taim long de bilong Gutnusi kamap long yumi wan wan," Mista Miringke i tok.



Roy Miringke, Ivens Kodineta bilong ELC/PNG.



Ol musikman bilong The Household. Ol Foto: pater Ambrose Pereira sdbd



Kruse bilong The Household ol sumatin i ektim.

Savio Haus selebretim pestode bilong Sekret Hat

Bruder Sylvester Kuli, SDB, i raitim

FOMESEN Salesien komyuniti long Savio Haus, Boroko, long Pot Mosbi i bin gat gutpela selebresen long luksave long pestode bilong Sekret Hat.

Ol i bin putim kamap pilai drama ol i kolim long 'The Household', long Jun 11 na 14.

"Lewa we i save laikim yu tumas i gat daun pasin na pulap long marimari. i moa-beta long ol lain i laik kamap ol rilijes na ol sumatin i luksave long dispela," Novis Bruder Sylvester Kuli sdb na Bruder Barnard Kaiiau sdb, i bin tok.

"Wantaim Pater Pankaj Xalxo sdb, Rektor, na gutpela toktok i bin strongim ol i kam

long Pater Pedro Sachitula na Pater Edwardo Revilla sdb, ol i bin makim pilai drama, 'The Household' we Paul Dungca sdb bilong FIN provins i bin raitim.

Dispela pilai drama i bin fokas long 7-pela kapitel sin olsem ol wan stes pilaia.

Wanpela de, ol i bin gat wanpela visita husat i bin tok promis long ol olsem em i gat gif bilong wanpela naispela pikinini, em JC o Jisas Krai.

Dispela pilai drama ya i soim senis we JC i kamapim long laip bilong ol lain i stap insait long pilai drama.

Ol rilijes komyuniti i bin gat sans long lukim dispela pilai drama long Jun 11, taim planti moa Salesien bin pulapim haus bilong ol Salesia, ol

wok manmeri bilong Don Bosco Teknolojik Institut, ol Boskonien man boda na meri boda bilong Caritas na ol salesien Sister i bin laikim stret pilai drama long Jun 14.

Ol singsing, danis na eksen long stes i bin pulim strong ol ekta wantaim ol mesej ol i ken bihainim long laip bilong ol.

"Em i bikpela samting long kisim ol yangpela pipel long amamas long lukim dispela pilai drama we i kisim divosen bilong Sekret Hat bilong Jisas long bilip long Marimari bilong God na tu, skelim ol eria we ol i no strong," Bruder Sylvester Kuli em dairekta bilong pilai i bin tok.

Plantu wok, taim na sakrifais em ol lain i

kamapim pilai drama ya i bin mekim bikos ol i save prektis tupela o tripela taim insait long wanpela wik.

Em i tok sakrifais i kamapim gutpela samting olsem bilip long ol yet (confidence) na tim spirit.

"Em i gutpela long ol ekta i yusim tiata long kisim tok we ol i klia long en i go aut," Pater Ambrose Pereira sdbd i tok taim em i tok amamas long ol lain i bin putim kamap dispela pilai. Na em i bin tromoi salens i go long ol lain i bin stap na lukim pilai long autim ol gutpela na positive mesej.

Pilai drama ya em ol i kamapim long taim PNG i wok long bungim hevi na moa yet, ol yunivesiti sumatin i no go long skul bikos ol i laikim

Praim Minista Peter O'Neill i lusim wok bilong em long wanem, ol i sutim tok long em long korap pasin.

Tasol planti samting bilong ol institusen i bagarap pinis, na sampela i kisim bagarap na wanpela i dai pinis.

The Household em i sans long glasim sin na mi pasin i stap long yumi wan wan, na senis bai kamap long yumi wan wan yet," Pater Ambrose i tok.

Yunivesiti i no ples bilong traibel pait na pasin bilong bekim pait



long ol arapela i stap ples klia tru. Stat long ol skul i go inap long ol yunivesiti na long ol wok insait long gavman. Yumi lusim ting pinis long stap bung wantaim olsem ol pipel bilong Papua Niugini na soim rispek long tingting bilong ol arapela.

Oltaim bai wanpela grup i bosim ol arapela na i no inap givim sans na larim ol arapela i autim tingting bilong ol.

Na bai olsem wanem nau? Bai i gat wanpela Komisin ov Inkwairi i kamap long ol dispela trabel long ol yunivesiti.

Tasol ripot bilong en bai i helpim long kotim ol lain i kamapim trabel o nogat? Bai em inap long stopim ol kain hevi olsem i kamap long bihain taim o nogat?

Husat bai karim hevi bilong ol bagarap ol studen i kamapim? Em yumi ol papamama husat i save baim takis long gavman.

I gat tupela bikpela samting dispela ol trabel long ol yunivesiti i soim ples klia.

PNG i mas kamapim moa yunivesiti we namba bilong ol studen long olgeta provins i mas stap stret na i no gat wanpela bikpela grup i bosim olgeta samting. Namba tu samting em kwaliti bilong i studen husat i go long yunivesiti.

Planti bilong ol i no gat rispek long ol arapela wanskul na propeti bilong gavman.

Ol dispela kain studen bai kamap wanem kain ol lida bilong PNG long bihain taim?

Dispela straik bilong ol yunivesiti studen i kamapim sampela bikpela moa hevi bilong lo na oda las wik. Long Yunivesiti bilong Papua Niugini long Mosbi, ol studen i bin kukim sampela bilding long Fraide nait. Ripot i tok long Fonde, sampela studen i bin pait wantaim ol sekyuriti na kukim foapela kar.

Na long Yunivesiti bilong Teknoloji long Lae, wanpela studen i dai bihain long sampela lain i go insait long rum bilong em na kilim em. Ripot i tok ol i kukim tu sampela bilding insait long yunivesiti. Wanpela bilong ol dispela bilding em haus kaikai bilong ol studen. Bihain long dispela trabel ol polisi go insait long kempas long stopim moa trabel na helpim ol studen husat i laik lusim ples.

Nesenel gavman i skelim dispela hevi long tupela yunivesiti na i gat ripot i tok gavman i tingting long putim kefiu long tupela yunivesiti.

Planti studen i lusim kempas pinis bikos ol i pret. Yunivesiti edministresen i tok bai skul i go het tasol ol tisa tu i no pilim seif long mekim wok bilong ol.

Ol i pret long ol trabel lain i bagarapim ol.

Dispela straik bilong ol studen ong UPNG na Unitech i bin stap longpela taim tumas.

I no bin gat gutpela rot bilong stretim toktok na larim ol studen i go bek long skul. Ol studen lida i mas karim dispela hevi bikos ol i no inap kontrolim ol studen.

Dispela pasin bilong sampela

studen husat i gat kriminal tingting, i bagarapim ol wanskul na bai bagarapim tu sans bilong ol narapela studen husat i laik go skul long dispela tupela yunivesiti long neks yia.

Ol arapela kantri tu bai i no inap salim ol studen bilong ol i kam skul long PNG.

Gavman i lusim bikpela mani long sanapim ol haus insait long

yunivesiti. Ol buk na masin na ol arapela ikwipmen i bin paia, bai i no isi long senisim.

Rot bilong kisim save, em i no samting we yumi ken baim long mani, nogat. Yu mas hatwok na lusim planti yia long stadi na bai yu ken kamap saveman.

Yunivesiti em i ples bilong kisim save. Em i no ples bilong karim ol samting bilong pait na kilim nat-

ing narapela man, o ples we ol raskal na trabelman i ken raun long laik na kamapim trabel.

Em i no ples bilong kisim ol wantok i go insait na skruim traibel pait wantaim birua.

Tude yumi wok long lukim dispela pasin bilong rijonalisim i wok long kamap strong long olgeta hap bilong kantri. Dispela pasin bilong strongim rijon na luk daun

Pikinini mas lain long stap long strong bilong em yet



PASIN kastom na waitman pasin klostu i wankain.

I olsem taim pikinini boi i bikpela olsem em i stat long gat maus gras o i gat 18 kris-mas na i go antap, em i taim long em bai stap longwe long papamama.

Long Papua Niugini em taim boi i go long hausman long lainim we o pasin bilong stap man.

Em i lain long go pasin bilong lukautim famili, stap long komyuniti, pasin bilong abus, pis, wokim haus na wok gaden.

Long waitman mipela i ken tok em taim pikinini i stap long kolis o yunivesiti long lain long kisim wok bihain.

Em olsem em i no moa slip kaikai wantaim papamama na ol i lukautim em olgeta taim. Nogat.

Tasol skelim kain sindaun em i mas stap wantaim ol sindaun bilong nau, wanpela bai lukim olsem kain sindaun i no stap. Nau yet wanpela bai lukim

olsem planti ol pikinini maski ol i bikpela ol i slip, kaikai yet long han bilong papamama. Moa yet maski ol i marit na gat pikinini, dispela ol pikinini ol i kamapim em papamama bilong ol i lukautim na ol yet i no tingting long lukautim pikinini bilong ol. Ol i larim bubu bilong ol i lukautim ol pikinini na ol i raun o stap tasol.

Yes, mipela i ken tok planti long dispela kain ol sindaun tasol wanpela as em bikos papamama i no save toktok.

Ol i laik tokim pikinini olsem em i bikpela pinis na i

mas lain long stap long strong bilong em yet o sapos nogat em i painim laip i hat olsem i hat long kisim wok o i painim haus long slip, long sampela taim em i mas mekim sampela liklik wok na sapotim laip bilong em yet.

Dispela kain tok i no rong bikos mipela i ken tok em pasin we papamama i gat trupela laik long pikinini bilong ol.

Ol i laik em i kamap man o meri tru. i no moa pikinini.

Dispela pasin i gutpela bikos em i givim taim long pikinini tu long lain long lukautim em yet, i gat tingting long lukautim famili na i gat tingting long stap gut long komyuniti.

Planti hevi long wanpela, long famili na komyuniti we nogat rispek na lukautim ol samting i kamap bikos ol pikinini mas ol i bikpela pinis em papamama i laik long lukautim ol yet olsem ol yangpela pikinini. Na taim ol pikinini i asua,

papamama bai hariap long go long sait bilong pikinini o i no laik long stretim pikinini.

Baibel i tok klia long buk bilong Gutpela Tingting (Proverbs) 28: 23 – em i tok: “Sapos yu stretim pasin bilong wanpela man, bai em i amamas tru long yu. Dispela pasin i winim tru pasin bilong tok gris long em.

Na long buk bilong Wok Pris (Leviticus) 19:17 – em i tok: “Sapos wanpela wantok bilong yu i mekim rong long yu, orait yu no ken kros oltaim long em long tingting bilong yu.

Yu mas stretim tok wantaim em bai tok i dai. Nogut yu tingim pasin bilong em na yu tu yu mekim wanpela rong,”

Stretim pikinini bai em i stap gut na amamas na yu tu bai stap amamas.

Lain long stretim hevi o tok long ples klia bai yu stap fri na amamas. Yu holim hevi o wari long tingting, dispela i ken bagarapim yu.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Bilum Books statim trening bilong SBE tisa

Frieda Sila Kana i raitim

BILUM Books, wanpela Australia Non Gavman ogenaesen we i save pablisim ol teks buk bilong tisa na sumatin long lainim Standet Bes Edukesen i stat pinis long holim ol woksop bilong trenim ol elementeri skul tisa.

Long Trinde Jun 15 ol i statim wantaim wanpela de woksop long Lae, Huon Galp distrik skul. Bihain long dispela woksop, ol i holim narapela long Ramu Sugar long Fraide 17 Jun.

Long las wik, ol i bin go long Madang na bihain ol i go long Wewak. Bihain long ol woksop

long Wewak, ol bai go long Aitape, Vanimo na Pot Mosbi na Maun Hagen.

Wanpela dairekta bilong Bilum Books, Irene Sawczak i tok ol tisa i soim bikpela laik long kisim profesenel developmen.

“Mipela i pinisim wanpela woksop long Maadang wantaim 71 tisa na olgeta i laik tru long lainim Standet Bes Elementeri Inggris Karikalama we i lainim ol tisa long foniks o we bilong kolim ol leta na 300 ol wod o toktok we bai ol pikinini i lainim pas tru. Ol tisa i lainim gut planti samting insait long ol lessen.

Bilum Books Publishing Kampani i bin lonsim ol program bilong em long PNG long Epril 21 na 22 dispela yia long Kiunga. Long taim bilong lonsim ol buks, ol i bin holim tupela de woksop long ol elementeri tisa bilong Kiunga long nupela Standet Bes Karikalama.

Bilum Buk i wok long givim ol profesenel developmen trening nating long ol tisa long lainim we bilong tisim foniks bilong elementeri tisa na long ol skul we i kisim ol buk bilong ol.

Long Fraide 17 Jun, Bilum Books ranim wanpela de woksop

long Ramu wantaim 50 elementeri na praimereri skul tisa long wei bilong yusim ol nupela Bilum buk bilong Standet Bes risos wantaim klia tingting na save. Ol i lainim vokebuleri developmen, speling na wod stadi long foniks.

Prinsipel bilong Ramu Intenesenel Praimereri Skul, Les Potter, i bin ogenaism dispela woksop we Ramu Egri Industri Limited i bin sponsaim. Ramu Egri Industri i bin baim tu wanpela set Bilum Buk foniks buk we ol i givim long wan wan Elementeri skul husat i bin kamap long

Ol lain i kisim woksop wantaim ol setifiket bilong ol bihain long woksop.



Irene Sawczak i wok wantaim ol tisa long woksop. Ol Foto: Bilum Books Publishing



Ol tisa i kisim setifiket bilong ol long Ray O'Farrell, Bilum Books Dairekta, Les Potter, Prinsipel bilong Ramu Intenesenel Praimereri Skul na Mathew Maim, Sels Menesa bilong Kristen Buks Melanesia, Lae.

Brexit: Wanem samting bai kamap nau?

YUNAITED KINGDOM (UK) o Briten i vot pinis long lusim Yuropien Yunien o EU. Rot we UK i bihainim ol i kolim long Brexit, Wanem samting bai kamap nau?

Stori long Brexit o Briten i lusim EU

Long 06:00 BST Jun 24, tok stret i kamap olsem UK i bin vot long lusim EU. Tasol namba wan samting yumi mas save em UK bai no hariap long bruk lusim EU. UK bai stap yet memba bilong EU long sampela yia, tasol dispela Brexit vot i kamapim planti toktok, tingting na ol senis long wol.

Bai gat nupela praim minista

Long wanpela stetmen ausait long Dowling Strit, Praim Minista David Cameron i tok gavman bai rispektim risal bilong vot na givim ol tok kliia olsem bai no gat samting i kamap long 2.9 milien pipel bilong EU long UK.

Tru, Mista Cameron i gat stap bek na stiaim wok long sip tasol em i tokaut olsem em bai risain bikos em i pilim olsem em i no raitpela man long go pas long UK inap long narapela mak.

Ol i ting olsem ol bai makim nupela Konsevetiv lida na praim minista long pinis bilong mun Septemba.

Leba bai bihainim em o nogat?

Leba lida Jeremy Corbyn i stap long presa long palamentari pati we i kwes-

enim posisen bilong em we sampela long pati bilong em i lukim em olsem em i no strongpela lida long taim bilong holim referendum vot. Tupela MP i givim pinis mosen i no gat bilip long Mista Corbyn na sutim tok long en olsem em i no mekim sampela strongpela samting long taim bilong referendum.

Sait bilong maket

Olgeta mani maket na sea na ol arapela bisnis, moa yet, bilding bisnis, i bin pundaun taim nius long Brexit o Briten i bruk lusim EU ui kamap. Velyu bilong paun em mani bilong UK i bin pundaun long foren eksens maket insait long 31 yia.

Tasol gavana bilong Benk ov Ingran, Mark Carney, i tok ol i redi pinis olsem kain samitng bai kamap na benk i sambai redi long givim helpim.

Sampela bisnis i tok ol bai lusim London na Briten na go logb ol narapela hap olsem Dublin o Frankfurt long Jemeni.

Ol lida long Yurop i tok wanem

Olgeta EU lida i bin laikim UK long stap long blok tasol lusim vot i mekim ol i kirap nogut na ol i no bilipim.

Ol EU lida bilong Jemeni, Frans na Itali i bin bung na toktok long disisen we UK i mekim bipo long EU bung we i wok long kamap nau.

Yuropien kaunsel Presiden, Donald Tusk i askim



long belisi i stap namel long 27 EU memba kantri.

Ol EU lida i wari long disisen bilong UK na ol i ting olsem dispela i ken strongim ol tingting long ol sampela narapela EU memba kantri i wokim wankain.

Rot long lusim EU

Em bai kisim sampela taim long UK i lusim EU, na bikpela samting em ol i mas bihainim Atikel 50 bilong 2009 Lisbon Triti.

Ol 27 memba bilong EU bai toktok na wanbel long ol samting pastaim ol i wokim fainol disisen.

Husat bai go pas long ol negosiesen bilong UK long EU?

Ol senia memba bilong gavman olsem - David Cameron, Sansela George Osborne, Foren Seketeri Philip Ham-

Lusim Yuropien Yunien O EU

Vot I go olsem wanem **51.9%**
17,410,742 i vot long lusim EU

No laik lusim EU

Vot I go olsem wanem **48.1%**
16,141,241 i vot long stap bek wantaim EU



Nicola Sturgeon I tok Scotland bai wokim referendum vot long kamap independen.

mond na Hom Seketeri, Theresa May – husat i sanap long sait bilong Stap wantaim EU. Sampela bilong ol bai lusim gavman taim Mista Cameron i pinis long wok bilong em.

I luk olsem nau, man we bai ol i votim olsem praim minista bai skruim ol wok.

Em bai husat - Boris Johnson Michael Gove – tupela man we planti i ting olsem i ken kisim dispela top wok, maski vot i go olsem wanem.

Ol edministresen long Scotland, Wales na Norther Ireland i laikim bai i gat lain long makim ol long dispela proses o wok.

Futja bilong UK bai olsem wanem?

Brexit vot I kamapim wari long bihain taim bilong UK.

Scotland I bin laik stap bek wantaim EU na dispela vot long lusim EU I win, em I lukluk nau long bihain taim bilong em. Wankain tu long Noten Ireland.

Namba wan ran bilong sip long nupela senis Panama Kenel

Wanpela bikpela mama bilong ol kontena sip bilong Saina i kamap olsem namba wan sip long ran i go long Atlantik Osen i go long Pasifik Osen bihainim Panama Kenel bihain ol i mekim dispela kenel i go bikpela.

Kantri Panama i stap long Saut Amerika na Panama Kenel em i wanpela bikpela banis rot ol i kamapim olsem sotkat rot long ol sip i go long en. Narapela em long Suez Kenel long Ijip.

Bikpela amamas i bin kamap we ol lain i bin bung long Cocoli lok long selebret i bin kamapim ol paiawok na

singaut amamas i stap.

Presiden bilong Panama, Juan Carlos Varela, i tok dispela wara rot inap yunaitim wol na em i bin tok tenkyu long klostu 30,000 pipel husat i bin wok long mekim kenel i go bikpela, stat yet long yia 2007. Mak bilong wokim dispela nupela han rot long kenel we ol sip i ken bihainim em 77 kilomita na ol i bin plenim long pinisim wok long 2007.

Tasol ol straik na hevi long kos i bin sloim wok long bildim nupela han rot i bin kostim \$5.2 bilien long mani bilong Amerika.



Panama i bilip olsem em i ken kisim moa revenyu long ol siping fi.

Saul Dogek Akung pairap wantaim nupela musik CD album

James G. Kila i raitim

OL NAISPELA singsing i wok long pairap nau long NBC Redio Madang we planti lain long Madang i amamas long harim.

Dispela nupela pairap long Madang nau em musik na nek bilong yangpela musikman Saul Dogek Akung. Bagaros ya i lonsim pinis album bilong em long las yia bihain long em i rekotim solo album bilong em wantaim 3PLE M Studio long Madang yet. Dispela nupela studio em stap long dabol rot i go olsem long Kalibobo.

Man i go pas long katim ol musik bilong Saul Dogek Akung em Exie Benjamin.

Dispela nupela solo album i gat 10-pela singsing we i stori long laip na long ples pasin tude.

Wantok Niuspepa i bin gat sans long stori wantaim Saul Akung sampela taim i go pinis taim em i wok long promotim nupela CD album bilong em long Niu Taun Plaza soping senta long Madang.

Saul Akung i stori olsem man husat i kirapim bel na intres bilong em

long katim wanpela solo musik album em biknem musikman bilong Yabob viles yet, Demas Saul.

Em i stori tu olsem long namba wan taim tru em i bin givim sampela ol gospel bilong em long putim insait long wanpela albam em ol biknem musikman bilong Madang i rekotim wantaim Tumbuna Trek Studio.

Saul i stori olsem long dispela taim em i givim tupela singsing long dispela album ol tupela song i promotim stret stail na kala bilong musik bilong Saul Akung. Tupela singsing em i bin givim long kompailesin album em 'Sinner Man' na 'Disable' na tupela song na i promotim stret nek bilong dispela yangpela musikman long PNG musik maket long Madang bikos NBC Redio Madang i save pilaim dispela singsing planti taim long program bilong en bikos planti lain i laikim stret.

Em i tok olsem long yia 2000 em i kamap wantaim strongpela tingting long mekim rekoting bilong em yet na stat long dispela taim em yet i raitim ol singsing.

"Planti ol singsing mi raitim i stori long laip ol manmeri i bungim na tu

ol naispela laipstail na ol samting mi yet i lukim," Saul i tok.

Em i tokaut tu olsem em save les long raitim ol singsing we i toktok tumas long ol meri.

Tru tumas, dispela nupela CD album bilong Saul Akung i wok long kamap feveret bilong planti lain long Madang.

Narapela samting tu em dispela yangpela musikman i go het yet long promotim ples Yabob olsem wanpela 'musik viles' long Madang provins bikos planti biknem musikman na ol ben tu i kam long dispela viles.

Sapos yu nupela man o meri orait nau bai yu save olsem Yabob viles i kamapim ol lain olsem Kale Gadagads (Kales), Old Dogs na Offbeats, Mesi Gauns, Trops Fam, na ol biknem musikman em leit Sandie Gabriel, Willie Tropu na Demas Saul.

Tasol 'matu stret' o bikpela man bilong Yabob we i kirapim stret pairap na nem long PNG music indastri em leit Tony Soru Subam bilong Sanguma ben. Tony Subam em tu i bilong ples Yabob.



Saul Dogek Akung soim nupela CD album bilong em. Foto: James G. Kila

Pilipin muvi pulim planti famili



Bos man bilong Digicel TV i lonsim tupela nupela sanel. TV Wan Action na TV Wan Life. Dispela tupela sanel save pulim ol famili long lukim.

Nicky Bernard i raitim

PLAY Box bilong Digicel TV i pulim planti famili nau long baim long wanem ol save soim ol gutpela muvi bilong ol Pilipin.

Ol Pilipin muvi i save pulim planti ol famili long sindaun wantaim na lukim dispela ol siris muvi long wanem, ol dispela muvi i save mekim ol i tingim bek ol pasin nau i save kamap long kantri bilong yumi.

Dispela ol muvi tu i gat mining bilong ol taim ol famili sindaun na lukim, long wanem ol papa mama save givim skul tu long ol pikinini bilong ol.

Sampela muvi bilong ol Pilipin save mekim ol famili i lap, sampela bai mekim ol bel kros na sampela save mekim ai wara pundaun long ai bilong ol.

Digicel Play Box save soim

tripela muvi bilong ol Pilipin long sanel bilong TV Wan Life insait long foapela sanel bilong ol. Na i gat taim ol dispela tripela muvi i save kamap.

Planti famili i save gut tru long wanem taim ol dispela muvi siris save kam on na ol save painim rot long apinun long go sindaun long fran bilong TV bilong ol long lukim. Planti famili tu i save bihainim ol dispela muvi siris bilong ol Pilipino na ol save les long lusim wanpela pat bilong dispela muvi.

Digicel Play Box tu save gat sas bilong em long tupela sanel bilong ol, TV Wan Life na TV Wan Action. Dispela tupela sanel em bai yu baim na lukim ol dispela muvi bilong ol Pilipin. Ol Pilipin muvi i save kam long TV Wan Life na sapos yu laik bihain ol muvi siris bilong wanpela wik, bai yu baim K30.


Planti famili nau i save sevim K30 bilong baim TV Wan Life long bihain ol fevered Pilipino muvi bilong ol.

Digicel Play Box tu i save givim kain kain ret bilong ol long baim, i gat wan wik, i gat bilong wanpela mun na sampela ol narapela ret tu bilong ol narapela sanel bilong ol.

TV Wan Life na Action nau i kamap feveret bilong planti manmeri na pikinini insait long Papua Niugini.



Em nau! Ol pikinini i ken painim rot i go long ples wantaim Wantok lain...



STORI BILONG TUMBUNA



Bilum i kamap we

Dispela stori i kam long hap long Finschhafen Distrik. Zacqarac em i wanpela man bilong o lain Mape pipel. Wanpela mon- ingtaim Zacqarac i kirap long bik- nait yet. Hariap tru em i stretim banara na spia bilong em. Dis- pela de bai em i go painim abus na ol kain pisin. Meri bilong em i kukim sampela taro long nait na em i karim wantaim, nogut em i hangre long bus.

mambu na i redi long sut. Bipo i no olsem, tasol moa moa yet pisin i kam long dispela de. Em ya i no pilai pilai long sutim ol kain kain pisin na tromoi i go daun long graun. Em i sindaun antap i stap i go na san i go daun. Na em i sutim pisin i go inap nau em i laik i go bek long ples. Em i lukluk i go daun nau, em i lukim tupela meri. Man, tupela meri masalai ya!

Meri, em i tok; "Tude bai san i kamap strong na mi mas sutim wanpela pisin bilong yumi kaikai." Ol i save mekim olsem long dispela ples. Zacqarac i hariap, nogut san i strong bai no inap em i bungim ol pisin. Em i sut stret long bikbus. Em i go insait moa yet long bus na em i kamap long as bilong wanpela draipela diwai.

Tupela i wok long mumutim ol pisin na pulimapim long bilum bilong tupela. Em i pret nau na holimpas long diwai antap na em i stap yet. Em i ting i no gat planti tok tasol tupela bai i kilim em tude tasol. Em i pret na tu, tuhat wantaim na no mekim nois liklik. Na tu i no rausim tupela, nogat! Tupela i pinisim blut bilong em. Tupela meri masalai i lukim em i stap antap yet. Na tupela i tok. "Yu no ken pret, yu mas i kam daun. Mitupela i noken mekim wanem pasin nogut long yu. Mitupela raunim ol pisin i kam nau na yu sutim pinis. Yu noken pret. Yumi i stap bel isi nau. Yu bai i karim sampela pisin na mitupela bai i karim sampela."

Bipo yet em i wokim wanpela lata i go antap klostu long liklik baret bilong diwai wara bilong ren i pulap gut na i stap long en. Em i go bosim dispela na sapos pisin i kam long waswas bai em i sutim em. Na bai em pulumapim long basket bilong karim i go long ples. Nogut ol spia i popaia, olsem na em i bin rausim insait long wanpela longpela mambu. Na em i putim long ples hait bi- long em i go inap long raun wara. Em nau em i hait gut tru long ples hait em i bin wokim antap long diwai tu. Em i sindaun na i wet long ol pisin. Zacqarac i bin putim spia i go insait long


Tupela tu, givim wanpela bilum long man ya. Man ya i pret na i stap nau, tupela i lusim bilum na i go pinis long bus. Liklik taim em i kam daun na spit tru i go long ples. Em i givim pisin na tu bilum long ol lain bilong em long ples. Ol i kaikai pisin nau, na i stat long wokim bilum.

PAINIM WOD PILAI

Ol wod lista:

- | | | |
|-----------------|-----------------|----------------|
| GRASOP | MIPELA | SUSAP |
| HATPELA | OLGETA | TAUNAM |
| KABIS | PARADAIS | TUMAS |
| KOROPELA | POROMAN | VIRGO |
| KRANI | RAUSIM | WATPO |
| LAPUN | SELAIM | WANTAIM |
| MANDOR | SMELIM | YESA |

Ansa bilong Wod Pilai isu 2180



A G R M D I B H E F F Z Y T D A I W P M S E Y A K
T I O E P L X R W F L P H S F F Y A J I S U T F P
C A T S A D O R T N L T E D D I L O I E O J U O C
F F I S V W E M E O M N F P A G S A M L K H P E F
C S G V M E B T A R O B P L K E M W P A R T S U E
N T B G L T D A O E F C G M D E T I R U A D F M I
B O S D V D P A R N S D X P X T U T P W N R H N T
Q Z I R I B D K I E S L C H G H M L F E I A N G R
A O M E S S F G P A R E R E S S A M T V L M E M A
W L M H B T J T E M S L J M U R S T A E I A C T J
R I W B D A H N S F B G R A S O P E P A Y R E E X
E M H M I C C O G G S A A C A A A O T E R G G J S
N R R B A K G I U A T H R A P L R N R S L S F O L
V F E N O X B I W L M D M K E O A T I O A A P N E
F R O A L E A E G C K R N P K W D B A M M N A F P
E O E Y A A S N L W E A T S E L A I M U A A S Z E
H J E L F J Y S M E L I M P Q K I E U R N E N H N
R E U E G I E R I M A D K R A U S I M E D A A F A
F C R Q N E S E S R O O D N P J B T A S O Z M W K
I T G C A E A N B R F K O H K L G E N N R O B E I



TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

PNG Atlits bai go long Olimpik

Caroline Tiriman i raitim

TUPELA Atlit bilong Papua Niugini bai sanap makim kantri long Olimpik Gem long Rio de Janeiro long Brazil long mun Ogas.

Ol dispela pipel em long Theo Piniau bilong Nu Briten provins na Toea Wisil bilong Westen Hailans provins bai go long Olimpik Gem.

Theo Piniau husat i save mekim ol treining bilong en long Florida long America i

bin winim long tim PNG Atlit Mowen Boi taim em i bin brukim 200m resis tupela wik i go pinis long Florida.

Dispela em bai namba wan taim Theo Piniau bai sanap makim PNG long wanpela Olimpik Gem. Toea Wisil i bin go long Olimpik Gems long London.

President bilong PNG Atletiks Asosiesen i tok, stap bilong ol dispela Atlit long Olimpik Gem bai helpim long strongim ol long ol spot bilong ol.

Solomon Ailan kisim tok lukaut long pis

Sam Seke i raitim

YELO Kad woning o tok lukaut em Yuropien Yunien (EU) i bin givim long Solomon Ailan fiseris i helpim kantri long lukim olsem ol pis ol i salim i go long ovasis i kiln na i bihainim lo.

Adrian Wickham, em Menesing dairekta bilong Soltuna Cannery i tok em i toktok pinis wantaim EU long dispela tok lukaut long iligel, i no ripotim na i no gat control pising o IUU.

EU i bin givim dispela yelo

kad tok lukaut long pinis bilong yia 2014, tasol Mista Wickham em i amamas long rot we gavman na EU i wok wantaim long kamapim wanpela nupela lo long stretim dispela samting.

Mista Wickham i tok Solomon Ailan pising indastri we i save dipen long EU maket bai kisim bikpela hevi sapos EU i putim em long Retpela Kad.

Mista Wickham i tok pising indastri em i bikpela bisnis we Solomon Ailan i save kisim mani long en.

Ol impoten sevis tasol i go het long Hagen Haus sik

Sam Seke i raitim

RIJONAL riferell haus sik long Maunt Hagen Siti insait long Westen Hailans Provins nau i pas bihain long ol dokta i risain long wok bilong ol long las Fraide.

Presiden bilong Hailans Nesanel Doktas Asosiesen, Dokta Benjamin Yapo i tok wan wan dokta tasol i gohet long provaidim ol "critical life-saving" sevis.

Moun Hagen Jeneral Hospital i gat 26 dokta, na Dokta Yapo i tok ol 21 dokta we i stap long miting bilong ol long Fraidei go pinis i wanbel long ol i lusim nau wok

bilong ol.

Em i tok dispela em long wanem ol atoriti i no harim ol krai bilong ol long planti samting ol i nidim long sevim laip long haus sik.

Dokta Yapo i tok namel long ol em hospital i nogat opereting tiata na ol i bin no wokim ol kainkain operesen long klostu wanpela yia nau, na i nogat mikro baioloji sevis long samting olsem 15 yia pinis.

Em i tok as bilong ol dispela hevi, em sait long menesmen bilong haus siki no luksave long ol dispela nid, na ol dokta na nes i laik long ol mas senis.

Haia Edukesen Minista na ol arapela i toktok long UPNG sumatin pasin

Caroline Tiriman i raitim

MINISTA bilong Haia Edukesen long Papua Niugini, Malakai Tabar, i tok em i no wanbel stret wantaim ol baragap we sampela sumatin long Yuniversiti bilong PNG i bin mekim longi kukim ol bus na kar, na sampla bilding.

Ol ripot i kam long PNG i tok, ol sumatin i bin kukim ol dispela samting bihanim pait wantaim ol sekyuriti.

Olsekyuriti bin putim ol toksave olsem Edministreseni bin laikim ol sumatin long go bek long skul.

Dispela trabel i kamap bihanim narapela bikpela hevi i bin kamap long yunivesiti long stat bilong dispela mun we ol polis is i bin sutim ol sumatin wantam ol gun.

Tupela long ol dispela sumatin i stap yet long Intensiv Kea Yunit long haus sik long Pot Mosbi.

Ol sumatin bilong UPNG na ol narapela yunivesiti no save go long skul long traim mekim Praim Minista Peter

O'Neill long lusim pastaim wok bilong en inap ol i pinis ol wok painimaut long korapsan em ol i sutim tok olsem em i bin mekim.

Na Jeneral Seketeri bilong Katolik Bishops Konprens bilong Papua Niugini na Solomon Ailani tok ol UPNG sumatin bai lusim olgeta rispek na sapot long ol pipel bilong kantri bihain long ol i bin kukim ol kar na bus na bilding long Yunivesiti.

Pater Victor Roche i tok ol sumatin i tok klia pinis long laik bilong ol long korapsan tokwin egensim Praim Minista na nau ol i mas go bek long skul.

Tasol, wanpela sumatin bilong UPNG, Samuel Apa bilong Simbu provins i tok, sampela narapla lain nau i bin mekim dispela trabel.

Minista bilong Jastis na Atoni Jeneral bipo long gavman bilong Praim Minista Peter O'Neill, Kerenga Kua i tok em i luksave long as bilong dispela ol hevi em ol sumatin i wok long mekim.



Wanpela bas sampela sumatin bilong UPNG i bin kukim.

PNG na Australia i nogat narapela rot

Sam Seke i raitim

TUPELA gavman bilong Papua New Guinea na Australia i nogat wanpela rot moa long kot sistem bilong PNG long hau tupela I ken abrusim disisen bilong Suprim Kot long sait bilong ol asailam sika long Manus Ailan.

Loya bilong ol asailam sika, Ben Lomai i toktok long ruling bilong kot long namba 26 Epril long keis we oposisen lida bipo, Belden Namah i bin bringim i go long kot.

Suprim Kot i bin rulim

olsem ditensen senta long Manus i egensin mama loa bilong Papua New Guinea, na ol i mas pasim na salim ol asailam sika i gobek long Australia.

Mista Lomai i tok, sapos ol i no bihainim hariap disisen bilong kot, em bai bringim narapela keis long contempt of court - oi no bihainim ruling bilong kot.

Em i tok Suprim Kotem bikpela kot long PNG na em i leit pinis tu long apil long sait long "slip rules" we i karamapim tasol ol liklik taiping mistek.

Vanuatu i sot tru long kava



Ol kava bek long Vanuatu.

Caroline Tiriman i raitim

VANUATU nau i gat bikpela sot long kava na dispela i mekim planti Kava Bars o nakamals i no gat kava long salim i go long ol pipel.

Kava em i stap olsem wanpela bikpela samting long kalsa bilong Vanuatu na planti ol narapla kantri long Pasifik rijon stat long Maikronesia, Melanesia na tu long Polinesia.

Ol i tok ol natural disasta olsem drought o taim bilong

bikpela san em El Nino i bin kamapim stat long 2015 i kam inap nau i bin daunim wok bilong planim kava.

Kava em i wanpela samting em ol pipel, na planti em ol man i save yusim taimol i bungim ol narapla man, na tu long ol bikpela bung long ples.

Dokta Vincent Lebot em i mansave bilong kava long Vanuatu Egrikalsa Dipatmeni tok Ailan bilong Efate we biktaun Port Vila i stap long en i sot tru long kava.

Pacer Plus i nogut long kaikai na helt bilong Pasifik pipel



Tupela long ol protesta long Pacer Plus miting long Melbourne long 2015.

Caroline Tiriman i raitim

TUPELA mansave bilong Monash univesiti long Australia i tok dispela wokbung namel long ol Pasifik Ailan kantri na Australia na Nu Silan em ol i kol im Pacer-Plus bai kamapim bikpela wari long fud sekyuriti long ol pipel bilong Pasifik.

Dispela toktok i stap insait long ripot bilong Dokta Jagjit Plahe na Wendell Cornwall, long wok painimaut ol i bin mekim bihanim askim bilong Pacific Network on Globalisation.

Ol i kol im dispela ripot long Defending Pacific Ways of Life

na em i bin lukluk long ol hevi em dispela kain wok bai bringim long ol Pasifik pipel.

Ripot ya i tok, Pacer-Plus bai no nap luksave na rispektim kain sidaun bilong ol Pasifik pipel long sait bilong kaikai long wanem, dispela tupela kantri bai save salim planti kaikai bilong ol i go long Pasifik we i no gutpela tumas long helt bilong ol pipel.

John Salong, wanpela bisnisan bilong Vanuatu na em i no wanbel tru long dispela Pacer-Plus i tok Pacer-Plus bai rausim ol takis em ol Pasifik kantri i save sasim long ol samting I kam long Australia na Nu Silan.

Nupela hotel bai op neks yia



NUPELA Cassowary Hotel long Kiunga, Westen Provins bai op long Januari 2017.

Ol konstraksen wok bilong dispela hotel i bin stat long mun Me dispela yia na ol man i bilip olsem dispela nupela hotel bai senisim Kiunga taun.

Dispela nupela hotel bai kirapim wok na tu helpim ol bisnis haus na arapela ol manmeri long mekim bisnis o go malolo na lukim ples long Kiunga.

Cassowary Hotel em i join vensa hotel bisnis bilong CMCA Propetis na Steamships Trading Company.

Dispela tupela kampani i bin laik long inves long Kiunga na mekim bisnis long kirapim ikonomi bilong Westen Provins.

Wanpela bilding na komesal konstraksen kampani bilong Sydney, George Group, i kirapim dispela hotel.

Gavana bilong Westen Provins, Ati Wobiro, Siaman bilong Ok Tedi Development Foundation (OTDF) na deputi Sif Eksekutiv Opisa bilong Ok Tedi Mining Limited (OTML), Musje Werror, na Jeneral Menesa bilong Coral Sea Hotels, Glenn Murphy, i bin bung long Kiunga na mekim graun breking seremoni.

Mista Murphy i tok Coral Sea Hotels bai menesim dispela hotel, wankain olsem em i save menesim arapela ol hotel bilong em long PNG.

“Mi laik tok promis olsem Coral Sea Hotels bai menesim Cassowary Hotel. Mi

laik tok tenkyu long CMCA Properties i bilip long Coral Sea Hotel na larim mipela i lukautim dispela bikpela hotel long Kiunga,” Mista Murphy i tok.

Em i tok Coral Sea Hotels i gat nem long hotel indastri long PNG na em i tok promis olsem dispela kampani bai helpim ol manmeri long kisim nupela save bilong wok long hotel, kirapim wok mani, na givim sans long ol asples long yusim dispela nupela hotel long bisnis na malolo wantaim.

Mista Murphy i tok ol i lukluk long opim dispela nupela hotel long Januari neks yia tasol ol bai kisim ol nupela wok manmeri bilong dispela hotel long mun Oktoba long dispela yia.

Fail foto i soim Westen Gavana Ati Wobiro wantaim arapela ol bikman bilong Westen Provins i witnessim saining seremoni we CEO bilong OTDF, Ian Middleton (Ilephan) na Fainens Dairekta bilong Steamships, Sean Pelling long yia 2014.

Puma lonsim nupela ges prodak

PUMA Energy i mekim opisal lonsing bilong wanpela nupela prodak bilong em long Lae, Morobe Provins long las wik.

Dispela nupela prodak em i Pumagas, na Puma Energy i nau putim aut dispela nupela prodak long maket.

Maketing Menesa bilong Likwifait Petroleum Ges (LPG) bilong Puma Energy, Gabriel Laka, i tok i wok long mekim bikpela invesmen long PNG taim em i tekova long Napa Napa refaineri na

arapela ol fiul stesin bilong InterOil long PNG.

Mista Laka i tok dispela invesmen bilong Puma Energy long mekim nupela ges prodak i kamap gutpela tru bikos em bai helpim ol manmeri long baim ges long liklik mani na yusim long kukim kaikai.

“Mipela i mekim dispela long PNG yet. Puma Energy i baim krud oil long Kutubu, kisim i kam long Napa Napa rifaineri na tanim dispela oil i go long LPG ges.

“Olgeta samting i kamap long PNG, na dispela prodak em bilong PNG yet,” Mista Laka i tok.

Em i tok taim Puma Energy i lonsim dispela nupela ges long Pot Mosbi, sels i kamap gut na planti ol manmeri i wok long baim dispela prodak.

Bihain long dispela lonsim long Lae, Puma Energy bai mekim nupela lonsim bilong dispela LPG gas bilong ol long Hailans, Momase, na Niugini Ailans rijon.



Ol i mekim Pumagas long Napa Napa rifaineri klostu long Pot Mosbi.

Frieda main bai kirapim moa mani

PLANTI gutpela samting i kamap long maining indastri long PNG na wanpela gutpela nius i kamap olsem Frieda River Projek bai kisim moa mani i kam long kantri.

Projek divelopa PanAust i tok dispela kopa na gol projek bai mekim moa long K39 bilien na apim gavaman reveniu i go antap long K11.8 bilien.

Frieda River Projek i stap long Is Sepik na Wes Sepik Provins. Ol maus man bilong PanAust i tok dispela projek bai apim Gros DomestikProdak (GDP) i go antap long K39 bilien long yia 2040.

GDP bilong Wes Sepik na Is Sepik bai go

antap long K36 bilien na provinsal gavman bai ksim K5.2 bilien.

PanAust i investim pinis klostu long K200 milien long hariapim dispela projek.

Na long dispela wik tasol, PanAust wantaim Highlands Pacific, tupela projek patna bilong Frieda River, i aplai long wanpela Spesel Maining Lis (SML) long opis bilong Mineral Risos Atoriti (MRA).

Menesing Dairekta bilong MRA, Philip Samar, i tok Frieda River Projek bai kamap wol klas kopa main taim tupela projek divelopa i kikstatim operesen taim konstraksen wok i pinis.

TISA egensim senis bilong kampani lo



Gabriel Tai.

WANPELA mausman bilong wanpela bikpela seaholda bilong Credit Corporation i les long ol dairekta i senisim Mama Lo bilong dispela kampani.

Siaman bilong Teachers Savings na Loan Society, Gabriel Tai, i no wanbel long senis bilong Mama Lo bilong Credit Corporation we i lukim ol dairekta bilong kampani i mekim dispela senis long larim ol yet i stap yet long bod sapos ol i abrusim 70 yia.

Mista Tai i makim maus bilong TISA, kampani we i wanpela kampani wantaim bikpela seaholda insait long Credit Corporation.

TISA em i namba tri kampani wantaim bikpela sea. Em i gat 15 pesen seaholding insait long Credit Corporation taim Nasfund i gat 19 pesen na Nambawan Supa i gat 20 pesen seaholding.

Mista Tai i askim ol arapela ol seaholda i no ken sapotim o votim dispela nupela senis i kamap long Mama Lo bilong kampani bikos em i no gutpela pasin bilong lukautim kampani.

“Ol samting bilong kopret gavanens i stap stret. Dispela plen bilong senisim kampani lo long larim ol bod memba husat i abrusim 70 yia krismas i stap yet long bod i no stretpela samting,” em i tok.

Mista Tai i tok Credit Corporation i mas gat plen long larim ol yangpela manmeri PNG i kamap bod ov dairekta bilong kampani sapos ol man husat i stap dairekta nau i abrusim pinis 70 krismas.

“Dispela pasin i no kamap stret. Ol dairekta i no autim wanpela gutpela toktok long larim dispela i kamap,” Mista Tai i tok.

Mista Tai i askim ol seaholda long vot egensim dispela plen taim kampani i holim anual jeneral miting bilong em long Jun 30 dispela yia.

“Dispela plen long senisim krismas mak bilong ol dairekta bai no inap helpim ol seaholda bilong kampani.

“Em bilong helpim ol dairekta bilong Credit Corporation husat i kamap 70 yia pinis. Sapos yu kamap 70, yu ken lusim wok. Larim ol yangpela manmeri i kamap dairekta na ranim gut kampani long kirapim veliu bilong seaholda,” Mista Tai i tok.

Ol dairekta na bod memba bilong Credit Corporation em, Sir Wilson Kamit, Garth McIlwain, Ian Tarutia, John Dunlop, Professor Albert Mellam, Robert Allport na Michael Koisen.

Long wankain taim, Sia-

man bilong Credit Corporation, Sir Wilson Kamit, i tokaut olsem Grup Sif Eksekutiv Opisa (CEO), Robert Allpot, bai risain na lusim kampani long pinis bilong dispela yia.

Mista Allpot i bin stap wantai Credit Corporation taim ol statim dispela kampani long yia 1987. Em i bin stat wok olsem Bisnis Divelopmen Menesa.

Bihain em i bin go stap Kantri Menesa bilong Credit Corporation long Fiji long yia 1992.

Mista Allpot i bin go beken gen long Pot Mosbi long yia 1999 na kamap CEO, na long yia 2011 ol i makim em i kamap Menesing Dairekta.

Mista Kamit i tok ol i wok long painim wanpela nupela man long kisim ples bilong Mista Allpot na ol i tingting long kisim dispela nupela man kam insait long lukautim kampani taim Mista Allpot i laik go.

Ol memba bilong bod ov dairekta na menesmen bilong Credit Corporation i tok tenkyu long Mista Allpot i bin mekim planti gutpela samting long kirapim dispela kampani na larim em i kamap wanpela strongpela fainens kampani long PNG na Pasifik.



Era Dorina em i wanpela bikpela invesmen bilong Credit Corporation long Pot Mosbi.

Demas na Shazy bai pilai long opim nupela maket

James G. Kila i raitim

OL pipel bilong Madang husat i save salim ol fres maket kaikai na i wet moa long tupela yia long sindaun gut na maket, bai amamas stret taim nupela Madang taun maket i wokim opisal opening bilong en long tumora.

Dispela nupela Madang fresh kaikai na pis maket bai opim geit bilong en tumora Fraide Julai 1 wantaim bikpela selebresen program bilong en.

Biknem Madang musik

man Demas Saul wantaim narapela biknem musik man bilong Solomon Ailan, Sharzy, husat nau pairap long redio wantaim song bilong ol 'Bilas bilum Bilong Wosera' bai pilai long amamas dispela bikpela de.

Dispela nupela maket em gavman bilong Siapan, aninit long Siapan Intanesenel Koporesen Ejensi (JICA) wantaim Nesenel Fiseris Atoriti i bungim han long kamapim, wantaim mani mak we i moa long K26 milien.

Insait long opening pro-

gram bai gat ol tumbuna singsing bilong tripela Lokal Level Gavman eria long Madang distrik na ol laip ben.

Ol ogenaising komiti i putim ol toksave pepa long ol pablik long dispela bikpela selebresin long opim bilong nupela Madang taun maket tumora.

Ol komiti i tokaut tu olsem sampela ol bikman na bikmeri bilong PNG gavman na NFA wantaim ol lain bilong JICA na Embasi bilong Siapan bai stap insait long dispela seremoni.

'KOICA givim nupela haus sik long ol pipel bilong Asaro'

Loutova Siapea i raitim

PLANTI pipel long Isten Hailans, Papua Niugini na wol tu ol i save gut tru long Asaro graun man (Asaro mud men).

Na dispela graun man em i save apim nem bilong PNG i go antap na putim long wol mep we ol pipel long wol i gat bikpela luksave long dispela tredisenel graun man.

Nem bilong dispela ples, Asaro em bai i go antap yet long wanem, long Fraide wik i go pinis, ol pipel bilong dispela eria i bin kamapim bikpela pasin amamas na selebretim opening bilong nupela rurel haus sik em Korean Intenesenel Koporesen Ejensiy (KOICA) i bin givim olsem wanpela spesel presen i go long ol pipel bilong Asaro na ol arapela haus lain long Daulo distrik.

Embeseda Kim Seong Choon i tok, "Dispela haus sik em i olsem wanpela spesel presen i go long ol pipel bilong Asaro, em ol pipel bilong Saut Korea i givim. Dispela i kamap, long wanem, gutpela pren pasin (baileterel rilesensip) em i bin kamap olsem na mipela i gat bikpela amamas long helpim na sapatim ol pipel bilong Asaro. Na dispela haus sik em i wanpela long

ol samting we mipela i bin i gat bikpela laik tru long kirapim na givim i go long ol pipel bilong dispela ples".

Em i tok, ol pipel bilong Korea i save lukautim ol yet gut tru long sait bilong helt bilong ol. Olsem na ol i laikim tu ol pipel bilong Asaro i mas kamap olsem ol, olsem na ol i kirapim dispela haus sik long helpim ol man, meri na pikinini long Asaro na Daulo distrik.

Helt ministra Michael Malabag i tok amamas, long wanem samting we gavman na dipatmen bilong em i no inap mekim long bringim kain haus sik i go long Asaro, em ol pipel bilong Saut Korea i mekim.

"Dispela em i bikpela samting tru bikos long lukluk bilong mi, dispela haus sik bai i ken sevim planti man, meri na pikinini long Daulo Distrik na tu long ol pipel bilong Suave long Simbu provins na ol arapela lain man na meri bilong ol arapela hailans provins na tu PNG husat i save yusim bikpela Okuk haiwe I long raun i go i kam.

Taim dsipela ol lain i kisim sik o painim birua long rot, ol bai i ken i go na kisim sevis long dispela nupela haus sik we i gat ol hai tek masin na ol arapela medikel ikwipmen

long helpim ol sik lain. Gavana bilong Isten Hailans, Julie Soso na Provinsal Edministreta, Solomon Tato husat i bin kamap tu long go pas long dispela opening seremoni i tok, planti tok pait na kros em i kamap pinis na provins i no bin lukim ol developmen olsem Asaro na Daulo distrik i lukim nau.

Em i tok amamas olsem em wantaim Tato i wanbel long wok bung na kamapim ol wok developmen insait long 8-pela mun long provins bipo long 2017 nesenel ileksen i kamap.

"Wantaim dispela tingting, provinsal gavman na provinsal edministresen i wanbel na givim tu handet tausen kina (K200,000.00) i go long helpim haus sik long wokim haus billong ol helt woka husat bai wok long dispela nupela haus sik. Mipela i amamas long mekim dispela bikos mipela i gat bikpela laik long helpim ol pipel bilong mipela long Isten Hailans", Misis Soso i tok.

Dispela em namba tu haus sik KOICA i givim.

Em i bin givim wankain haus sik long namba wantaim i go long ol pipel bilong Kwikila long Rigo Distrik long Sentrel provins long 2015.

Papet so long pren wantaim envairomen

Stori kam long WCS PNG Midia

OL sumatin bilong Luteran, Melton na Kopkop elementri skul insait long Nu Ailan provins i kisim nupela kain stail bilong papet so we Wail Laip Konsevesen Sosaiti (WCS) i ranim long mun Jun.

Ol i traime dispela papet so insait long dispela tripela elementri skul stat long de 14 i go 16 bilong mun Jun olsem wanpela nupela wei bilong edukesen we Gavman bilong Australia i putim mani long ranim aninit long Dairek Eid Program (DAP).

"Mipela i ting olsem papet so em i wanpela isi wei bi-

long givim edukesen," WCS wokman, Francis Gove i tok.

Tingting bilong papet so em long lainim ol sumatin long bikpela tingting bilong lukautim envairomen na bilong wanem as ol pipel i no ken bagarapim.

Mista Gove i tok klia olsem papet so i soim pasin bilong ol manmeri long as ples. Masi na Pasi i toktok ples klia long ol hevi we i save kamap long envairomen na wanem kain tingting ol komyuniti i gat.

"Ol hevi we i save kamap long Klaimet Senis, olsem ol samting bilong kisim pis we i save bagarapim ol rip olsem dainamait na tu long

save long gutpela wei bilong lukautim ol mangro diwai," Mista Gove i tok.

Kopkop Elementri skul het tisa Jane Jimmy i tok, ol kain kain pilai long so i holim gut tru ai bilong ol sumatin.

Em i tok olsem dispela em i nupela kain wei long ol i lukim wanpela laip papet so.

"Ol sumatin i save pinis long lukluk long kain program olsem long televisen tasol nau ol i lukim wanpela laip stret long ai bilong ol, em i narapela samting olgeta.

Em bikos ol toktok we ol i mekim em i isi tru long ol pikinini i kisim klia save," Misis Jimmy i tok.



Ol pikinini i sindaun na lukim ol papet so bilong Masi na Pasi long lukautim envairomen.



Ol bikpela man na meri bilong gavman bilong PNG na Korea wantaim Minista bilong Helt na HIV/AIDs, Michael Malabag, Embeseda bilong Korea Kim Seong Choon, Gavana bilong Isten Hailans, Julie Soso na pastaim gavana na bisinis man, Mal Kela Smith i stap long lukim nupela haus sik bilong Asaro i op.

PNGSDP i stopim ol developmen projek long rurel komyuniti

PNG Sastenebel Developmen Projek (PNGSDP) i stopim olgeta developmen projek na i wok long mekim invesmen, pastaim Sif Eksekutiv Opisa (CEO) David Sode i tok.

Mista Sode i tok taim gavman i kisim Ok Tedi Main, PNGSDP i lusim mani em i save kisim long dispela kopa maining.

Dispela i mekim hat long PNGSDP i mekim ol developmen wok long senisim laip bilong ol manmeri Weste na arapela manmeri long PNG.

Mista Sode i tok mani bilong PNGSDP i stap gut na i no gat wanpela man i tasim.

Em i tok long tem fan bilong PNGSDP i sanap olsem US\$1.3 bilien long yia 2014 na 2015.

"No gat wanpela man i kaikai dispela

mani, no gat wanpela man i kisim dispela mani, em i stap gut," Mista Sode i tok.

Mista Sode, husat i kamap bod memba taim ol i rausim em i kamap CEO long mun April dispela yia, i tok ol i nau wok long mekim ol invesmen long groim dispela mani, na strongim veliu bilong kampani.

PNGSDP i save mekim planti developmen wok long kirapim ol ples long ol rurel komyuniti long Westen Provins.

Tasol taim gavman i kot wantaim PNGSDP long kontrolim mani, kot i stopim olgeta developmen wok bilong em.

PNGSDP i save mekim haus sik, rot, bris, skul, na i save givim arapela ol sevis long pipel bilong Westen Provins na tu long PNG.

Storms daunim Tigers



Tim Simona i ran long skorim wanpela trai bilong ol West Tigers.

MELBOURNE Storms i daunim West Tigers, 29-20, long AAMI Park.

Long namba wan hap bilong resis, Storms i lokim ol Tigers we ol Tigers i no bin kisim wanpela poin. Storms i bin putim 4-pela trai na i stap pas wantaim 26-0.

Tasol, long namba tu hap bilong resis, ol Tigers i bin putim 4-pela trai na bringim skoa bilong ol i kam antap long 26-20 klostu long pinis bilong resis.

Ol Melbourne i pasim win bilong ol wantaim wanpela fil gol i kamap long lek bilong Cooper Cronk taim 4-pela minit i stap yet.

Long wankain taim, Cameron Smith i strongim win bilong ol wantaim wanpela penelti kik.

Namba tu hap bilong resis i kamap moa strong taim ol Melbourne i laik strongim sait bilong ol long ol i stap pas na Tigers i strong tru long kisim skoa.

Poland daunim Switzerland long penelti

POLAND i daunim Switzerland, 5-4, long wanpela penelti kik bihain long Portugal i daunim Croatia na Wales i daunim Northern Ireland.

Poland i winim 2016 Euro Sempionsip kwata-fainel long namba wan taim bilong em.

Grzegorz Krychowiak i kikim bal i go insait na kisim poin bilong win bihain long Granit Xhaka i misim namba tu penelti kik bilong Switzerland, na mekim ol sapota bilong Poland insait long Geoffroy Guichard Stediam i amamas.

Jakub Blaszczykowski i kisim wanpela gol long 39 minit na Poland i stap pas, tasol Xherdan Shaqiri i bungim dispela skoa wantaim wanpela stail kik long 82 minit na pilai i kamap wankain stret.



Xherdan Shaqiri i kisim wanpela gol na bungim skoa bilong ol, 4-4, wantaim wanpela stail kik.

Long wankain taim, pilai bilong ol Portugal, Ricardo Quaresma, i kikim bal i go insait long tupela golpos na daunim ol Croatia, 1-0, long 2016 Euro kwata-fainel.

Quaresma i kikim bal long namba 3 minit bilong ekstra

taim bihain long Danijel Subasic i stopim kik bilong Cristiano Ronaldo.

Wales i daunim ol Northern Ireland, 1-0, long wankain sempionsip resis we Gareth McAuley i kikim dispela gol i go insait.

Gallen bai toktok long Gould

SKIPA bilong New South Wales, Paul Gallen, i toktok long sekim Phil Gould long ol i bin mekim sampela tok-tok long Stet ov Orijin resis long stopim dispela kain nogut toktok.

Gallen na Gould i no gat bel isi taim bipo kosa bilong Blues i mekim sampela nogut toktok taim ol i bin lus egensim Maroons long Orijin gem namba II.

Gould i bin mekim wanpela hait toktok long Gallen bihain long Maroons i win 10-pela taim long 11 yia bikos ol i no skelim ol posisen gut.

Kosa bilong Sharks, Shane Flanagan, i tok olsem wanem toktok Gould i mekim em i no gutpela, tasol Gallen i les long toktok bihain long ol Sharks i bin daunim ol Warriors, 19-8, long Sarere.

“Mi bai no inap toktok long dispela long pablik; mi bai toktok long rot bilong mi yet,” Gallen i tok.



Paul Gallen i no amamas bihain long Blues i lus long Orijin II.

“Olgeta lain i gat wan wan tingting bilon gol yet, na em i no minim olsem olgeta lain i wanbel long dispela toktok.”

Kosa bilong ol Blues, Laurie Daley, i stap long presa na i laik mekim sampela liklik senis na i tokaut long pablik na i laikim Gallen long stap long Olimpik Stediam

bilong ol Sydney long Julai 13. Kepten bilong ol Sharks i tok orait long toktok bilong kosa bilong ol Blues.

“Tasol, Orijin namba III em i no wanpela resis i gat moa pawa.

“Sapos mi stap, mi bai stap, na sapos mi no stap, mi bai no inap stap,” Gallen i tok.

Etlit long Russia i lukluk long resis

SIKSTI-SEVEN (67) etliti long Russia i plen long raitim pas i go long IAAF long resis long Rio Olimpik gems bihain long ol i rausim kantri bilong ol long resis bikos ol etlit i kisim ol marasen i tambu long resis.

Intenesenel Asosiesen bilong Etletik Federesen Kaunsil i tok orait long las wik na strongim ol toktok we ol i bin tok nogat long ol trek na fil resis bilong Russia bai kamap long Rio, bikos ol i bin kisim sampela

marasen o drag we ol i tok nogat long ol etlit bai kisim.

Tasol, IAAF i lusim dua i op bilong ol klin etlit i ken resis long Rio, sapos ol i soim olsem ol i no kisim dispela marasin o drag.

IAAF i sekim ol man gut tru na putim spes bilong ol etlit husat i bin trening ausait long Russia na dispela i rausim namba wan pilai bilong pol vault, Yelena Isinbayeva, na 110 mita hedel wol sempion, Sergey Shubenkov.

France i go insait long kwata-fainel

TIM France, husat i go pas long Euro 2016 sempionsip i stap baksait na i go insait long kwata fainel bihain long ol i daunim Ireland, 2-1.

Fowod bilong ol France, Antoine Griezmann, i straikim bal i go insait long golpos tupela taim long namba tu hap bilong resis na rausim namba tu minit penelti kik gol bilong Robbie Brady.

Ol France i amamas long namba wan nokaut win bi-

long ol. France bai pilai egensim England o Iceland long semi fainel resis.

Tim Belgium i pait strong long go antap long top long taim bilong resis. Ol i bin daunim Hungary, 4-0, na i go insait long kwata-fainel egensim ol Wales.

Belgium i bin stap pas long namba wan hap wantaim, 1-0, na long namba tu hap bilong resis, ol Wales i no bin kisim wanpela skoa

na ol Belgium i skrium skoa bilong ol i go antap long 4-0 wantaim tripela gol.

Germany i daunim Slovakia, 3-0, bipo long Belgium na Wales i pilai. Ol pilai husat i bin kisim gol em Jerome Boateng, Mario Gomez na Julian Draxler we ol i pusim Germany i go insait long kwata-fainel resis.

German bai pilai egensim ol Spain o Italy long kwata-fainel resis.



Antoine Greizmann i skorim wanpela gol bilong ol France egensim ol Ireland.

Bailey-Cole i kisim Zika virus



Etlit bilong Jamaika, Kemar Bailey-Cole.

RANA bilong Jamaika, Kemar Bailey-Cole, i tokaut long nius lain long Jamaika olsem em i kisim Zika virus klostu taim, tasol em i plen yet long ran long Olimpik traime resis long wik i kam.

Bailey-Cole em i 100 mita sempion bilong Komonwel resis, i tokim Gleaner niuspepa olsem em i painim dispela sik.

“Mi no save olsem mi kisim dispela sik inap mi bin painim aut long taim mi go long katim het gras bilong mi. Bihain long klinim olgeta het gras, gelpren bilong mi i lukim olsem nek bilong mi i solap na em i hap we dispela sik i go in sait,” Bailey-Cole i tok.

“Mi pilim olsem baksait bilong mi pen na sua i kamap long ol masol, na mi ting olsem ol dispela pen i kamap bikos long ol ekseis mi save mekim. Dispela i kilim tingting bilong mi.”

Namba wan rana i tok em bai go het na resis long ol traime resis wantaim tingting bilong em i ken tingim olsem em i helti na redi.



Inlen Paiplain (Maigari) na Kostal Paiplain LOA eksekutiv tok promis



Nupela Siaman bilong Kostal Paiplain LOA, Jeffrey Kinai Gamrai tok-promis long mekim wok wantaim Buk Tambu (Baibel).



Nupela Deputy Vais Siaman bilong Inlen Paiplain LOA, John Koty mekim promis.



Long-taim Siaman bilong Inlen Paiplain LOA, Peter Tai sainim gen deklresesin long holim gen wok.



Nupela Seketeri bilong Kostal Paiplain LOA, Jerry Kamias mekim promis.

OL EKSEKUTIV bilong tupela long ol foapela lenona asosesin (LOA) insait long Ramu Nikel Projek long Madang provins long aste (Trinde, Jun 29) i tok promis na holim Buk Tambu (Baibel) long mekim wok long sevim ol pipel insait long projek eria bilong ol.

Dispela seremoni i bin kamap long Tamane Ges Haus Konfrens rum long Madang fran long Madang Distrik Kos Mejistret, Robert Teko.

Ol nupela LOA eksekutiv bilong Inlen Paiplain LOA na Kostal Paiplain LOA em ol i ilektim ol long mun Epril dispela ya 2016-6-29, tasol taim bilong swering-in i bin kamap long aste.

Ol dispela nupela LOA eksekutiv i sainim ol pepa long tokaut aninit long lo bilong kantri tu na tok promis wantaim Buk Tambu (Baibel) long karimaut stret wok bilong ol long sevim ol pipel.

Ol eksekutiv bilong Inlen Paiplain LOA husat i sainim deklresin pepa em siaman Peter Tai, vais siaman John Koty, seketeri Jacob Winis na tresera em Mikoni Weipa.

Ol nupela eksekutiv bilong Kostal Paiplain LOA em nupela siaman Jeffrey Kinai Gamrai, vais siaman Sauya Parara, seketeri Jerry Kamias na tresera em Padi Bateng.

Swering-in bilong ol lain KBK LOA eksekutiv i bin kamap pinis long mun Me. Ol lain long Basamuk LOA em no yet bikos hevi bilong ol i stap long kot yet.

Long las wik antap ol tripela lain eksekutiv bilong KBK, Inlen Paiplain na Kostal Paiplain LOA i bin stap insait long indaksen trening em Mineral Risoses Atoriti (MRA) i kamapim long stiarim ol long wok bilong ol olsem eksekutiv insait long LOA.

Planti strongpela salens na toktok tu i bin kamap long indaksen we bai stiarim ol lain LOA eksekutiv olsem disisen na wok ol i mekim em long lukautim na karim hevi bilong ol pipel.

Olsem na ol i mas save gut long mining bilong wok lida na wanem wok long sait long menesmen bilong eksekutiv bilong mas wokim stret.

“Lidasip em min olsem yu mas givim strongpela menesmen save na stia long pusim na givim givim strong long ol pipel bilong yu long wok strong long kamap long wanem mak na gol yu laikim long en,” Dispela em sampela salens we i bin

kamap long indaksen long las wik antap.

Trena long indaksen Fred Tieng, husat em wanpela konsalten i tokim ol lain LOA eksekutiv olsem taim ol i kisim wok insait long LOA ol i mas save gut olsem ol i makim ol liklik manmeri na pikinini insait long impekt eria bilong Ramu Nikel Projek.

Mista Tieng i tokim ol LOA eksekutiv olsem mining bilong menesmen em olsem proses na sistem, na bikpela samting tru na mining bilong menesmen em long wokim samting stret.

Dispela indaksen woksop em gutpela stret bikos em i givim gutpela tingting na stia long ol nupela eksekutiv bilong Ramu Projek LOA long lusave long wok bilong ol olsem lida na wanem wok i stap long menemen bilong LOA bilong ol.

Tripela LOA eksekutiv bilong Ramu Projek husat i stap long indaksen em ol lain long KBK LOA, Inlen Paiplain na Kostal Paiplain wantaim ol eksekutiv bilong ol.


Treina Mista Tieng i tok strong long indaksen olsem lidasip wok i karamapim tripela bikpela samting. Dispela em namba wan em yu lida man o meri, namba tu em ol lain husat i bihainim o stap wantaim yu na namba tri em wanem wok bai yu kamapim.

Bikpela samting we Mista Tieng i tokaut long ol LOA eksekutiv em olsem wanem asosesin ol i kamapim em fomal o lo i karamapim em na wanem bisnis em i wokim i mas go wantaim lo stret na noken bihainim ol tingting bilong ples.

Dispela indaksen long las wik Fraide i lukim ol stekholda insait long Ramu Projek i givim ol presentesin bilong ol long wanem wok bilong ol.

Namba wan lain em delopola yet Ramu NiCo Menesmen (MCC) we i lukim sinia Komyuniti Afes (CA) supavaisa Allan Wahwah i givim toktok long wok bilong kampani. Bihain long em wanpela wokman bilong MRA i givim toktok long wok bilong ol na wanem seksen insait long MRA. Wanpela mains inspekta long MRA, Simon Gena tu i bin stap long stori liklik long wok inspektoret i save wokim.

Long Fraide tu i lukim Ekstenol Afes Jeneral Menesa bilong Mineral Risoses Dvelopmen Kopresen (MRDC), Imbi Tangune i givim toktok long wok MRDC save wokim long givim klia tingting long ol lain LOA eksekutiv.



135 KM Slurry Pipeline

KBK Mining

BSK Refinery

Trukai Fan Ran i kamap long 16 provins



Ol lain i bin wokabaut wantaim long taim bilong Trukai Fan Ran long Pot Mosbi.

29 etlit bai go long Suva

ETLETIK PNG i tok aut long nem bilong fainel 29 etlit bai go resis long Melanesien Sempionsip long Suva, Fiji, long mun i kam.

Long 29 etlit, 15 em ol man etlit na 14 em ol meri etlit we ol i bin makim bihain long nesanel sempionsip i kamap long Lae na ol narapela hap tu.

Ol i bin skruim 5-pela etlit husat i save trening long PNG long prilimineri tim we ol i bin tokaut long Me 17. Ol 5-pela etlit em Emmanuel Wanga, Abel Siune, Martin Orovo, Nancy Malamut na Lyenne Nilmo.

Letisha Pukaikia i gat 15 krismas na em i save trening long Nu Silan bai ran long anda 18 resis bihain long em i kamap wantaim strongpela kala bilong em long dispela divisen long nesanel resis.

PNG Olimpik Komiti (PNGOC) i sapotim Tim PNG na skruim sampela etlit i save trening long USA olsem Rellie Kaputin, Theo Piniau, Adrine Monagi, Peniel Richard na Poro Gahekave.

Taim ol i tokaut long tim,

Seketeri, Philip Rehder, i tok olsem ol i bin makim ol namba wan junia etlit tasol long namba wan tim bikos i nogat inap mani long skruim sampela moa etlit.

"Mipela i painim hat taim bikos i no gat inap mani long developim moa etlit inap long taim bilong Pasifik Gems, na lukluk bilong mipela long dispela yia em bilong strongim na amasim ol etlit husat i bin mekim gut long ol Gem. Dispela em i namba wan samt-ing long sait bilong plen bilong mipela long bihain taim," Rehder i tok.

"Ol grup husat i sapotim tim em IAAF, Osenia Etletiks na PNG Olimpik Komiti. Etletik PNG tu i painim sapot long ol wan wan kopret spona na ol bai tokaut bihain."

Rehder tu i laikim ol wok-lain bilong media long sekim Etletik PNG long ol i ken mekim sampela stori bilong Etletik i mas noken paulim ol etlit, kosa na ol i save lukim pilai.

"Etletik PNG em i gat

pawa long makim ol tim na dispela em i no bikpela spot gem we ol etlit bilong mipela bai resis aninit long Tim PNG," Rehder i tok.

Ful tim bilong ol man em; Nazmie Lee Marai, Wesley Logorava, Charles Livuan, Ephraim Lerkin, Peniel Joshua, Piniau, Wanga, Orovo, Siune, Richard, Steven Ray, Robson Yinambe, George Yamak, Debono Paraka na Mowen Boino.

Ful tim bilong ol meri em; Toea Wisil, Afure Adah, Shirley Vunatup, Donna Koniell, Malamut, Peni, Pukailia, Nilmo, Gahekave, Monagi, Kaputin, Mary Kua, Jacklyn Travertz na Annie Topal.

Tim Meneseres em Monica Henao na Nola Peni bai kamap namba tu. Kosa, Dior Lowry, husat i save stap long USA na wok wantaim sampela etlit bilong PNG long tupela yia i go bai go long Fiji long kisim wanpela bikpela kos bilong ol kosa na bai stap Het Kosa bilong Tim PNG.

Mowen Boino bai stap long Pot Vila, Vanuatu, na go long Suva long helpim Lowry, na bai resis long 400 mita hedel.



Mowen Boino i tok tenkyu long Theo Pinia long em bai makim kantri na go resis long Rio Olimpik Gems.

Olimpik Gem bai abrus ...trenspot na sekyuriti i gat bikpela toktok

RIO de Janeiro intarim Stet Gavana, Francisco Dornelles, i tokaut olsem Rio 2016 Olimpik na Paralimpik Gems bai abrus sapos ol i no mekim sampela gutpela arensmen long sekyuriti na trenspot plen.

"Mi gat positiv tingting long Gems, tasol mipela i mas soim gut," Dornelles i tok.

"Mipela i go pas long bikpela Olimpik, tasol sampela lekmak i no kamap orait em mipela bai abrus.

"Mi bin tok olsem i no gat gutpela sekyuriti na ol han

SEKETERI Jenerel bilong Papua Niugini Olimpik Komiti (PNGOC), Auvita Rapilla, i tok tenkyu long ol lain i save stap long 16 provinsal taun na soim sapot na wokabaut wantaim long 2016 Trukai Fan Ran long las wiken.

Fan Ran i kamap bikpela long Pasifik long olgeta yia taim tausen manmeri na pikinini wokabaut wantaim long olgeta hap long wol.

Fan Ran em i bikpela fan resing iven bilong PNGOC long taim ol yet i bin statim long 1983, na i save mekim mani long olgeta taim bilong Tim PNG long resis long ol intenesenel resis bilong spot.

"Fan Ran em i bikpela fan resing iven bilong PNGOC, na mipela i gat bikpela ama-

mas long ol sapot we bikpela spona bilong yumi, Trukai Industries, Air Niugini, IBS, PNG sports Foundation, NCDC, ol sapot sevis patna olsem PNGDF, Polis, Transpot Department, St. Johns Ambulance, na ol yangpela lain, ol etlit na ol famili i soim," Rapilla i tok.

Ol lain i wokabaut long mak bilong 5-pela kilomita long bungim hap we ol i stat wokabaut. Ol i bin statim dispela resis long 2 klok moning long wokabaut 4.2 kilomita moa.

Rapilla i tok tenkyu long Gavana bilong NCD, Hon.Powes Parkop, long sapotim dispela iven wantaim trenspot na redim moa graun sekyuriti.

Presiden bilong PNG Olimpik Komiti, Sir John

Dawanincura, na fulbek bilong North Queensland Cowboys na Queensland, Matt Bowen, i stap tu na i wokabaut wantaim.

Dawanincura i tok, olgeta mani ol bai mekim long Trukai Fan Ran em ol bai yusim long salim Tim PNG long resis long intenesenel iven, na nau ol bai go resis long 2016 Rio Olimpik Gems.

Papua Niugini Cancer Foundation i join olsem patna bilong Fan Ran na promotim gutpela helt na strongpela laipstail.

Fan Ran wokabaut bilong dispela yia i soim olsem moa long 50, 000 manmeri na pikinini i wokabaut long ol strit na klostu long 30, 000 pipel i wokabaut long Pot Mosbi.

Bowen stap wantaim long Trukai Fan Ran



Matt Bowen i apim tropi we Not Kwinslan Cowboys i bin winim long las yia NRL sisen.

NAMBA wan pilaia bilong Not Kwinslan Cowboys, Matt Bowen, i bin kam long Papua Niuginin long las wik Fraide olsem opisal gest bilong yia Trukai Fan Ran wokabaut i bin kamap long Sande.

"Mi save i gat bikpela laik long kam long PNG na mi gat bikpela amamas na tok tenkyu long bikpela sapot we ol pipel i givim.

"Dispela em i bikpela ekspiriens long stap long PNG na bikpela sans long wokabaut wan-

taim long Trukai Fan Ran iven," Bowen i tok.

Komyuniti Menesa bilong Not Kwinslan Cowboys, Jeff Reibel, i bin kam wantaim Bowen long kam bilong Bowen long PNG.

"Klap i save tok tenkyu na gat bikpela amamas long olgeta taim long bikpela sapot we ol pipel bilong PNG i save givim na strongim rilesensip wantaim Trukai Industries.

Trukai Fan Ran long Sande i bin bungim bikpela namba bilong pipel long iven i bin kamap long Pot Mosbi na wantaim ol narapela senta tu.

Bowen i tok em i bin go hariap long lukim planti ol yangpela pikinini i wokabaut.

"Wanpela namba wan toktok mipela i laikim ol pikinini long ol komyuniti long arim gut na bihainim em, ol i mas stap longwe long ol drak na alkohol. Ol i mas kaikai gut, pilai gut na stap gut long helpim na kamapim seif na stronpela komyuniti," Bowen i tok.

Bowen i gat bikpela sans long stap insait long ol narapela komyuniti engesmen program we em i bin go long Vision City, Waigaini long bungim ol sapota long sainim ol Trukai Fan Ran "t"siot ol i baim na kisim poto.

Bihain, em i bin go Life PNG Care long Gerehu, Cheshire Homes na City Mission long Mirigeda long sait bilong Magi Haiwe.

rot em mipela bai gat bikpela hat taim.

"I no gat gutpela trenspot sistem na long wanem rot ol pipel bai go kam long ol hap bilong pilai?"

"I no gat sekyuriti na ol pipel bai pilim seif olsem wanem?"

"Mipela i mas soim olsem mipela i gat inap sekyuriti na trenspot sistem bilong ol pipel long kam long kantri."

Dispela i soim olsem planti asua i stap bipo long Gem i kamp.

Intarim Presiden bilong

Brasil, Michael Temer, i tok orait long skelim ol fan o mani bilong federal na sapotim Rio long pinisim ol projek we ol i gutpela long Gems.

Wanpela projek ol bai pinisim long dispela mani em han rot i go long senta bilong taun na olgeta long Olimpik Park sait long Barra de Tijuca.

Wanpela peimen aninit long BRL\$989 milion ol i givim long Stet Gavman em Nesanel Developmen Benk long Brasil i tok nogat bikos ol i no bin baim ol dina mani ol i bin kisim bipo.

Dornelles i tok, taim dispela sapot i kamap, ol bai gat inap mani long polis patrol bai kamap long taun inap long pinis bilong pilai.

Sekyuriti em i bikpela wari bikos namba wan Palalimpik pilai bilong Australia, Liesl Tesch, em ol i bin putim em long ganpoin na kisim olgeta samtig bilong em klostu long Guanabara Bay long las wik.

Ol i lukluk long salim samtig olsem 85, 000 sekyuriti fos long taim bilong Gem.

Lewas i trening hat long kwalifai



SITI Pamas Limited Lewas i trening hat long go resis long mun i kam long Intenesenel Kriket Kaunsil (ICC) long Is Asia Pasifik (EAP) Rijinol Kwalifai bilong ol meri long Samoa.

Kepten bilong Lewas, Pauke Siaka, i tok em i amamas long resis long kwalifai taim olgeta tim i lukluk stap.

Ol pilai husat bai kamap kwlaifai bai ran long Julai 15 inap 22.

“Ol Lewa i kisim moa strong long ol wok redi mipela i bin mekim pinis. Mipela i bin kamap stronpela tim long EAP na i kamap namba wan na nau mipela i redi long kisim dispela top ples gen,” Siaka i tok.

Kosa bilong Lewas, Rodney Maha, i tok olsem em i putim ol skwat aninit long ol mak long mekim wok redi long go

long Samoa.

“Ol meri i mekim gut long trening bilong ol aninit long wan wan trening eria bilong ol,” Maha i tok.

“Na tu, mipela i gat tripela nupela meri tu i kam insait long tim long ol narapela provins, na dispela i kamap namba wan taim na em i skruim sampela moa strong.”

Lewas bai pilai egensim Japan na tim i go pas long kriket resis, Samoa, long 50 ova resis we ol bai pilai tupela taim.

Wina bilong dispela resis bai go long global kwalifai long resis long ICC Kriket Wol Kap resis bilong ol meri bai kamap long Ingran.

Kwalifai bai kamap long klostu long pinis bilong yia 2016 o stat bilong 2017.

Ol Lewas meri i trening.

Zeming na Amean i kisim bagarap

SP PNG Hunters i lusim namba wan pilaia, Noel Zeming, na fulbek, Stargroth Amean, bikos tupela i kisim bikpela bagarap.

Tupela bai no inap pilai inap long 6-pela o 8-pela gem bikos tupela bai no inap orait hariap.

Zeming na Amean i kisim bagarap taim ol Hunters i bin pilai egensim ol North Devils na ol Hunters i lus, 24-8.

Zeming i go long operesen long han bilong em taim Amean i go long sken long skru bilong em.

Kosa bilong Hunters, Michael Marum, bai makim fainel 18 man skwat tumora bipo long tim bai go long Australia long Fraide.

Raun 17 gem bai kamap egensim ol Tweed Heads Seagulls long Sande we ol bai

stat long 2 klok apinun long Piggabeen Spots Kompleks long Brisbane.

Long wankain taim, SP Hunters i go bek long namba 4 ples long lata bilong 2016 Intras Supa Kap resis bihain long North Devils i daunim ol long Bishop Park, Australia.

Ol top 6 tim em;

- 1 Burleigh Bears wantaim 25 poin;
- 2 Redcliffe Dolphins wantaim 24 poin;
- 3 Townsville Blackhawks wantaim 23 poin;
- 4 SP Hunters wantaim 22 poin;
- 5 Easts Tigers wantaim 21 poin na;
- 6 Sunshine Coast Falcons wantaim 17 poin.



Noel Zeming i takolim wanpela pilai bilong ol North Devils.

PNG swima winim medal

SWIMMING tim bilong Papua Niugini i winim 6-pela medal, tripela silva na 3-pela brons, long Osenia Swiming Sempionsip long Damodar Siti Akwatik Senat long Suva, Fiji, na kam bek long Sande.

Namba wan swima bilong Papua Niugini, Ryan Pini, i winim ol silva long 50 mita bataflai, 50 mita bekstrok na 100 mita bataflai.

Sam Seghers i winim namba wan brons long 200 mita fristail narapela tupela brons em ol i winim long miks na riley resis bilong ol man.

Long 4x50 miks resis em Shanice Paraka long baksait, Barbara Vali long Breststrok, Ryan Pini long flai na Sam Seghers long fri i winim namba wan brons.

Namba tu brons ol i bin winim long miks resis em long 4x100 we Pini long bek, Ryan Maskelyne long breststrok, Seghers long flai na Stanford Kawale long fri na dispela em las resis bilong Swiming Sempionsip.

Tim i bin go long resis em Leonard Kalate, Stanford Kawale, Ryan Maskelyne, Shanice Paraka, Ashley seeto, Barbara Vali, i swim na kamapim rekot bilong ol yet long olgeta resis.



Ol PNG swima i winim 6-pela medal long Osenia Sempionsip.

Tigers i stap namba wan yet long lata

SNAX Lae Tigers i go het na holim strong namba wan ples long lata bilong 2016 Digicel Kap resis.

Bihain long namba 11 raun, ol boi long Morobe i stap long namba wan ples wantaim 18 poin, we ol i bin winim 9-pela gem, wanpela lus na ol i bin stap sambai long wanpela gem.

Ol Bintangor Goroka Lahanis i stap las long lata wantaim 6 poin we ol i bin winim tupela gem tasol long dispela sisen. Risal bilong resis i kamap long las wik Sande em Eagles

daunim Wigmen, 34-6, Isapeas daunim Muruks, 20-16, Gurias daunim Lions, 18-14, Tigers daunim Tumble, 22-14, Mioks daunim Lahanis, 16-14, na ol Viper i bin stap sambai.

Leta bilong Digicel Kap em:

- 1 Snax Lae Tigers wantaim 19 poin;
- 2 Wamp Nga Mt Hagen Eagles wantaim 17 poin;
- 3 Agmark Rabaul Gurias wantaim 16 poin;

- 4 EGP Mioks wantaim 15 poin;
- 5 Waghi Tumble wantaim 13 poin;
- 6 Kemele Hela Wigmen wantaim 11 poin;
- 7 PRK Mendi Muruks wantaim 10 poin;
- 8 PRK Gulf Isapeas wantaim 9 poin;
- 9 SNS Port Moresby vipers wantaim 9 poin;
- 10 TNA Lions wantaim 7 poin na;
- 11 Bintangor Goroka Lahanis wantaim 6 poin.



Gol suta bilong Telstars i redi long tromoi bal go long ring taim pilai bilong Paramana i ran kam long stopim em long Primia divisen pilai long Mosbi.



Gol atek bilong Maemids i redi long pasim bal long primia pilai bilong ol long Bisini Netbal Kot.



Netbal eksen bilong ol Divisen 8 long Bisini Kot.



Muruks winga Wesley Vali ran we long pilai bilong Isapea long pilai bilong long Mosbi. Isapea i win.



Ol lain i save stap long Vabukori viles long Pot Mosbi i pilai kriket long namba 4 de bilong Olimpik wik taim ol woklain bilong Papua Niugini Olimpik Komiti (PNGOC) i go lukim ol long las wiok Fraide.



Moa long 23 sumatin long Kilakila Prameru Skul i amamas long Olimpik De na i train pilai Taekwondo long Taurama Akwatik Indo Senta long Pot Mosbi.



DIANA Tuna

Niupela Swit Teist
Nau Igat Moa Oil!



PNG's ORIGINAL TUNA

PNG MADE Manufactured by:
RD TUNA CANNERS LTD.

Pini i stap long rot bilong Olimpiks

NAMBA wan swima bilong Papua Niugini, Ryan Pini i tok em i stap long rot bilong go long 2016 Rio Olimpiks bai kamap long Ogas.

Pini i winim Silva long 50 mita bataflai resis bilong ol man taim em i resis egen-sim namba wan swima bilong Australia, Cameron

Jones, long Osenia Swimming Sempionsip long Damodar Siti Akwatik Senta long Suva, Fiji. Camerone Jones i klokim

24.27 seken na i winim gol na Daniel Hunter bilong Nu Silan i bin klokim 24.62 seken na kamap namba 3. Pini i kamap namba 2 na

winim silva medal wantaim 24.45 seken.

"Dispela em i namba 6 taim bilong mi long Osenia Sempionsip resis na em i bikpela samting," Pini i tok.

"Em i gutpela tru long resis long ol gutpela pul na kamap wantaim dispela kain taim bikos dispela em las na bikpela resis bipo long Olimpik Gems.

"Mi stap long namel bilong wok redi bilong mi long go long Rio Olimpik na mi gat bikpela amamas bikos mi mekim gut."

Pini i amamas long ol yan-pela swima bikos ol i mekim gut.

"Mi bin resis egensim Jones long Australia na em i gutpela long ol yanpela swima i go long hap na putim han mak.

"Mipela i lukluk long

tripela de i kam long kisim gutpela taim."

Long wok redi bilong em long go long Rio, Pini i redi long mekim gut. "Mi no laikim sampela samting, tasol mi laik mekim gut," Pini i tok.

Long wankain taim, Pini i pinisim namba 4 ples long 100 mita taim em i klokim 57.34 seken long bekstrok resis.

Jones i no stap long Australia tim long go long Rio Olimpik Gems, tasol em i amamas long resis wantaim Pini.

"Mipela i resis wankain na em i gutpela long resis olsem long ai bilong planti lain," Jones i tok.

"Mi bai no inap long go long Rio Olimpiks, tasol mi amamas long kam long hia na resis long bikpela resis.



Pini i resis long 50 mita bataflai resis bilong ol man long Osenia Sempionsip long Suva, Fiji.

Mitsubishi FUSO Rosa Bus



Apgrred ensin
130Hp
4 silinda disel



**Ikamap Wantaim
26 na 30 Sit**

Hariap nau na go long
Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2659 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg



MP1412294s